

ASO TOFI, 02 IUNI 2022

Na nofoia e le Fofoga Fetalai le Nofoa i le itula e 9:32 i le taeao.

Tatalo.

FOFOGA FETALAI: Ou te faasilasila atu ua amatalia nei Tualumaga a le Fono Aoao Faitulafono.

POLOAIGA O FAALAVELAVE TUTUPU FAAFUASEI

FOFOGA FETALAI: E faasilasila atu i le mamalu o le Palemene ua ou taulimaina nei le Poloaiga o Faalavelave Tutupu Faafuasei mo le Koviti-19, e pei ona faamaonia e Lana Afioga, O Le Ao o le Malo, Tuimalealiifano Vaaletō'a Sualauvi II, i luga o le Fautuaga a le Kapeneta e pei ona taua i lalo, mo le faataatiaina i le Laulau-a-Fono:

1. Poloaiga o Faalavelave Tutupu Faafuasei Numera 80, na amata faamamaluina mai i le itula e 12:00 i le taeao o le Aso Lulu, 1 o Iuni 2022 seia aulia le itula e 11:59 i le po o le Aso Lua, 28 o Iuni 2022.

FOFOGA FETALAI: O le a sama ia se gagana a le Fofoga Fetalai e faafeiloai atu ai i le paia o le tatou Maota i lenei taeao. O sa e le avea ma mamalu e le taufaafuluina i paia faaifogata o le Palemene. O lea ua fetalai le ala i le aoee, ua utu foi matagi i le liu o le aitu na leiloa, ma ua fisaga le sau nai malata ma tofatuimoana. E tatou te faafetaia ai lava le alofa tulituli o le Atua ua mafai ai ona tatou fesilafai i le fiafia i lenei taeao mo le faaauauina o le tatou galuega, ina ua maleifua mai i le lagi e mama lau Afioga i le Sui Palemia. O se taimi tatou feiloai ma le Afioga i le Taitai o le Malo le Afioga i le Tamaitai Palemia, afifio a outou Afioga i Minisita o le Kapeneta faapea foi a outou Afioga i Minisita Lagolago.

Ua maleifua mai foi i le soifua manuia lea Itu o le Maota i lau Afioga i le Sui Taitai o le Itu Agai faapea le mamalu o sui usufono uma o le Palemene. Sa tatou afaatasi foi i sauniga o le faamanatuina o le 60 tausaga o le tatou Malo Tutoatasi i le aso ananafi. O le viiga lava e foi atu i le Atua ona o mea silisili ua Ia faia mo i tatou.

E faatalofa atu foi i le tapuai mai a le Afioga i Le Ao Mamalu o le Malo ma Lana Masiofo, le Afioga i le Sui Tofia ma le faletua, le Afioga i le Faamasino Sili ma le mamalu o le Faamasinoga.

E le faagaloina foi le tapuai mai a Faauluuluga o Ekalesia Kerisiano uma i le atunuu ma le paia o le aufaigaluega faauuina o le talalelei.

Samoa i ou paia faaleaganuu, i le afua mai mauga tetele se i paia se aupito itiiti, malo afua ailao ua maua. E faatalofa atu lau Palemene i lenei taeao, malo le soifua manuia.

Sa molimauina foi i ala o fesootaiga faaonaponei i sauniga sa feagai ma le tatou atunuu i le aso ananafi mo le faamanatuina o le 60 tausaga o le tatou Malo Tutoatasi. Faafetai i le paia o le aufaigaluega a le Atua ma pulega mamalu a alii ma faipule i afioaga taitasi i le lagolago mai i le tatou galuega tauamo faatasi, ua matagofie ai le faamoemoe o si o tatou atunuu i le aso ananafi. Faamalo le taupati. Ia foi le viiga i le Atua i Lona alofa i si o tatou atunuu.

Ou te faatalofa atu foi i le paia o Ofisa Sili o Pulega o Matagaluega ma Faalapotopotoga Tumaoti a lo tatou Malo ua tatou mafuta faatasi i lenei taeao, ae tainane foi o nisi o le mamalu o le atunuu ua auai mai e molimauina taualumaga a le Palemene. Malo le soifua manuia ma le lagi e mama.

Le alofaiva o le tatou Maota i lenei aso, tatou folau ma le faatuatua, ma lalafo mea uma i le Atua e to ai manu mo le tatou valaauina. Manuia tele le usugafono a le Palemene i lenei taeao, manuia foi le tapuai mai a lo tatou atunuu.

TUUINA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5):

1. P.P.2022/2023 Nu.15, Lipoti a le Komiti o le Vaega Tau le Va Fealoai i le P.P.2020/2021 Nu.8, Lipoti Faaletausaga a le Faalapotopotoga o Tau i mo Faalavelave Tutupu Faafuasei mo le Tausaga Faaletupe 2019/2020.
2. P.P.2022/2023 Nu.16, Lipoti a le Komiti o le Vaega Tau le Tamaoiga i le P.P.2020/2021 Nu.126 & P.P.2021/2022 Nu.41, Lipoti Faaletausaga a le Ofisa o Fuainumera Faamauina mo Tausaga Faaletupe 2019/2020 & 2020/2021.
3. P.P.2022/2023 Nu.17, Lipoti a le Komiti o Tupe Maua ma Tupe Totogi i le P.P.2020/2021 Nu.110 & P.P.2021/2022 Nu.11, Lipoti Faaletausaga a le Falemeli o Samoa mo Tausaga Faaletupe 2019/2020 & 2020/2021.

Ma le faaaloalo lau Afioga.

ILOILOGA O LIPOTI A KOMITI FAA-PALEMENE

P.P.2022/2023 NU.1, LIPOTI A LE KOMITI SUESUE FAAPITOA A LE PALEMENE I LE P.P.2021/2022 NU.36, LIPOTI O LE TAUNUUGA O LE SUESUEGA E FAATATAU I LE MATAUPU NA LAGA E LE LOIA SILI E UIGA I TEUTEUGA O LE FAAVAE 2020 & TULAFONO O FANUA MA SUAFA 2020 – felafolafoaiga faaauau Aso 2

FOFOGA FETALAI: E tolopo felafolafoaiga i le Aso Lua, 31 Me 2022 o lo o saunoa le Sui Usufono mo Faasaleleaga 5.

Ia, ou te talitonu o le taimi lenei e faaauau ai le saunoaga a lau Afioga i le sui usufono mamalu. Ou te talitonu foi o lea ua malama le Maota i lo outou taumafai mai i le upu mamalu, a o lea foi ua manino mea uma. E talitonu o le a avatu le avanoa lenei o lau toe saunoaga, ina ia e saunoa sao i le tulaga o lo o i ai le Lipoti a le Komiti.

Ia ma le agaga faaaloalo tulai mai le sui usufono mamalu mai Faasaleleaga 5 e faaauau lau saunoaga.

Afioga PESETA VAIFOU TEVAGAENA (Faasaleleaga 5): Ia, e momoli atu le faamalo ma le faafetai a lou nei sui usufono i le paia maualuga o le Maota i ona tulaga faalupe, o lea foi ua uma ona e totoina le niu i le tuaoi aua lo tatou vatapuia ma le tatou Matai Sili. E ui lava la i lenei taeao e le o afio mai le Afioga i le Tamaitai Palemia, ae momoli atu lau faafetai ma lau faamalo i le Afioga i le Tamaitai Palemia aemaise foi le paia maualuga o lo outou Aiga Kapeneta ma le la Itu o le Malu. E faapea foi lenei Maota aua foi le faamoemoe o si o tatou atunuu i le aso ananafi, e matauina le alofa ma le agalelei o le tatou Matai, i le matagofie o le aso, matagofie le tau. E pei o le agaga fiafia lea i lou nei sui usufono e oo mai i lenei taeao. Ia atonu o se taimi o lenei aso tatou feiloai ma le Afioga i le Tamaitai Palemia, ia o le agaga fiafia lea ma le agaga faafetai.

Ae ua ou manatu, o le a tuusao atu loa se manatu o lenei itumalo i le tatou Tulafono. Ou te fia faafesiligia lau Afioga i le Taitaifono, ona o lea ua manino iuofe o la outou Lipoti ma ua leai lava se vaipanoa e le i malamalama ai lenei Maota, faafogafoga ma faalogologo le Maota i lau saunoaga matagofie e faamanino ma faamalamalama vaega uma. I lau foi matau ma lau vaai i le Lipoti lenei, ia, o se Lipoti e tele, masalo tai tutusa lava ma le mafiafia o le Tusi Paia le tou Lipoti. Ae i lau matau ma le aano moni lava i le faamaninoina o la outou auiliiliga o le Lipoti, o lea e matua manino lava, o lea ua aumai la outou Lipoti i mafuaaga na i ai fesetaiga ia. O lea foi ua saunoa foi lau Afioga i le Taitaifono, sa outou samania ma valaauina le sa avea ma Loia Sili a le tatou Malo ma lona soatau, e faapea foi le Afioga i le Peresetene o le Faamasinoga o Fanua ma Suafa, ma nisi foi o le Ofisa o le

Fono Aoao Faitulafono. O lea ua manino mai ai i i le Lipoti, o nai fesetaiga lava i totonu o le tatou Matagaluega o le Fono. A o lea foi e manino lava i i le Tulafono Tumau a le tatou Maota, a i ai ni tulaga foi lea i ni feeseeseaiga laiti, o la e lava e manino le tapena o le pepa e toe ave ai e saina mai ai le Afioga i Le Ao o le Malo ma toe aumai ai e toe fai le isi pepa e tuuina mai i totonu o le Maota leni. O le aoga lena o le mea leni o le Tulafono Toe Teuteu. Ioe. A i ai ni faaletonu i se Tulafono, ona toe aumai lea i totonu o le Maota leni e toe teuteu, ae peitai o lea ua aumai la outou faaiuga, a o lea e taoto lava le tatou Tulafono lea e 113 o le Tulafono Tumau, e ao ai ona tatou lilifa i le Tulafono ina ia matua faamanino i totonu o le Palemene ni mea o faaletonu. O la ua uma ona saina Le Ao o le Malo. A i ai la ni vaega e le o talafeagai ma isi kopi, ia o mea na e ao ona toe fai le pepa e ave i Le Ao o le Malo, ina ia toe tuu mai i tua le Tulafono e toe fai i ai teuteuga.

O lona lua o le isi mafuaaga e avatu ai lou tetee i le Tulafono lau Afioga i le Fofoga Fetalai, lou tetee i le Lipoti lea ua tuuina mai, ia, o lena e te silafia lelei lava e lau Afioga i le Taitaifono, sa le tatau ona e Taitaifono, sa le tatau ona e i ai i le Komiti, conflict, leaga sa faaali au molimau tetee i le taimi na talanoa ai le pili leni ma le Tulafono leni, ae le i aumaia le Tulafono i totonu o le Maota. O le a faapefea la ona e toe nofo fai mai faaiuga a o lena foi e te solia le Tulafono? Sa le tatau ona e nofo i ina i le Tulafono lea.

FOFOGA FETALAI: Ia, se i fai mai sina au malologa se i tulai mai lau Afioga i le Minisita mo Faatoaga.

Susuga Hon Laauli Leuatea Polataivao Fosi (Minisita mo Faatoaga ma Faiga Faiva): Ia, lau Afioga i le Fofoga Fetalai, e tulai lava ma le ava ma le faaaloalo e piama foi i lou fofoga faafetai i leni taeao i le alofa ma le agalelei o le Atua, aemaise foi le aso ananafi. Viia le Alii i mea uma.

A o se mea lava e fia faamalamalama ma fia fesili atu i le sui usufono mamalu, ona o lea lava e matau foi mai le Aso Faraile na tatou talanoa ai, e pei o lo o i ai le agaga lea e mama le mataupu. E pei o lo o i ai le agaga lea o se mea foi lea laitiiti, na ona faaletonu lava faasolomuli toe aumai toe fai. Ia, o lea foi la ua oo le saunoaga a le sui usufono, ua amata ona agai e le amanaia le filifiliga o le Afioga i le Taitaifono. Na ona ou faatepa lava le sui usufono mamalu o lo o saunoa i le mama lea e saunoa mai ai, e le se mea faigata na ona tuu mai lava toe faatupu ma toe faaalu. E faigofie ia outou le mea lea o le pasi e le Palemene o faaiuga e fai ae avatu i le Ofisa o le Fono e faataunuu ae sui i fafo i o? O se mea faigofie le mea lea o le pasi e le Palemene o mea e tatau ona tuu i totonu o le Tulafono ae avatu i fafo i o o ifo isi tagata sui? E faigofie le mea lena? E faigofie le mea lea na fai nei o le faatauto o le Sui Peresetene ae leai se Tulafono ona ua sui atu e tagata i fafo o le Palemene?

O le ala lea lau Afioga i le Fofoga Fetalai, o la e faafofoga mai le atunuu, leaga e le o i luma tatou tala, o lea tatou te tago faatumutumulima ma tatou manatu e faigofie le mataupu. Lau Afioga i le Fofoga Fetalai, ia o lea la ua saunoa nei i le le tatau ona saofai o le Afioga i le Taitaifono. O ai na tofia lau Afioga i le Fofoga Fetalai? O le Palemene o le atunuu, ma e leai se isi pule i luga atu o le pule lena. Na ona ou faaoololomaau, e saolele le saunoaga a le sui usufono, ae aua ne i o tatou manatu faatauvaa i le mataupu lenei, leaga o le Tulafono na o toe foi i tua ia Samoa e aumai faasaosaoga. Ua a nei? Ua a nei le augani atu e toe tuutuu mai laitiiti i tua se i fai le tatou mataupu. Lea ua outou faafofoga ma faamanino mai le atunuu, ua uma na saina Le Ao o le Malo, aumai i fafo sui, sui e latou ae toe tuu i ai le saina ua uma ona fai e ese mea na silafia e Le Ao o le Malo. E mama ia outou ia mea? Ia na ona faapena atu, na ona faapena atu a o saunoa le sui usufono.

FOFOGA FETALAI: Malo faafetai saunoa i lau Afioga i le Minisita. Se i tulai mai lau Afioga.

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai, ou te tulai atu ma le faaaloalo o le mea e fia faasao.

FOFOGA FETALAI: O fea le mea lea e te faasao? E faasao le sui usufono lea e saunoa po o le faauilavea a le Minisita?

Tofa Hon Lauofo Fonotoe Nuafesili Pierre Lauofo: Ia, e faamalamalama si...

FOFOGA FETALAI: E leai, e le faatagaina i le tatou Tulafono Tumau.

Tofa Hon Lauofo Fonotoe Nuafesili Pierre Lauofo: Leaga o lea e saunoa lautele mai i le matou Itu. O lea e fai mai, e faigofie ia outou le a, e faigofie ia outou le a. Agai pea i o i le saunoaga a le sui usufono ia, afai lava o le saunoaga a le sui usufono e le o faigofie ia ia, ia saunoa sao ona tau fua lea o matou ia. Leaga o lea e tofu lava le sui usufono ia ma lona finagalo faaalua, e tofu lava le tagata ia ma lona finagalo e faaalua, e tofu lava le sui usufono ia ma lona finagalo.

FOFOGA FETALAI: Ia, ua lelei, o lea ua maua atu lou finagalo.

Susuga Hon Laauli Leuatea Polataivao Fosi: Ia ou te tulai lava ma le agaga faaaloalo. Afai la ua ou faaaogaina le gagana lautele, leaga na aafia foi i lana saunoaga i le vaiaso lea na tea nei. E mama, fai mai e faigofie, o a faigofie o lea e taufai atu nei le Tulafono ua malepe.

FOFOGA FETALAI: Faafetai i lau Afioga i le Minisita o lea ua maua le... Tulai mai le Minisita o Galuega.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le mea e fia faasao. E ala ona ou fai atu, e le i faaaogaina e au le upu lea mama. Na ou fai atu, e faigofie le mataupu pe a tatou o i luga o le fautuaga a le Loia Sili. O lea e taoto le fautuaga a le Loia Sili i le mataupu i le auala e fofu ai le faafitauli ua tulai mai. Ae faigofie lava le mataupu la e aumai e le Loia Sili e pei ona ou talanoa i ai.

FOFOGA FETALAI: Ia, o lea ua manino, o lea ua manino le faamalamalama a le Loia Sili, o lea ua manino.

Se i tulai mai le Minisita mo Galuega.

Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese): Faafetai i lau Afioga i le Fofoga Fetalai mo le avanoa. O au ma lau faalogologo ananei i le folasaga manino foi a le Afioga i le sui usufono, ua latalata atu lava lou agaga i le Atua i lana folasaga manaia sa fai i le alofa ma le agalelei o le Atua, ae i ai lava tatou upu masani foi ia, e le moe le Alii o le lalolagi.

Ae ua ou tulai lau Afioga i le Fofoga Fetalai, e i ai lava le mea na oo i ai le saunoaga a le Afioga i le sui usufono mamalu i mea ia o fesetaiga, pei ona saunoa le Afioga i le Minisita o Faatoaga i le mama. Fai mai o fesetaiga e masani ai, ae a ou faatepa lau Afioga i le sui usufono mamalu, lea ou te vaai atu i le Lipoti i le itulau e 20 lea e talanoa ai imeli ia i fesuaiga ia, e i ai le upu lea, for your eyes only. O le a le mea e ala ai ona nana fesootaiga ia i suiga ia na fai? Afai ua for your eyes only, o lona uiga, e i ai le mea sese lea na fai i luga i i. O lona uiga lau Afioga i le Fofoga Fetalai, e sese lea tala e le iloa le faiga o le mistake lea, o la sa o latou iloa lelei. Ma o suiga foi ma le faasese lea na fai, e alu atu lava i o i le Ofisa e tau i le tagata na fautuaina le Afioga i Le Ao Mamalu o le Malo. O lea e manino i i, a o lea ou te le o vaai atu lava po o fea lea e gata ai le suesuega lea. E amata atu i le Palemene i le transition lea, avatu i o i le Ofisa o le Fono tapena, tapena ma mea ia o tusi faamaonia ia e ave e fautuaga ai le Afioga i Le Ao Mamalu o le Malo, e gata i ina le faasese. Aua e le mafai lava ona ia le iloa, e le iloa e le Palemia sa i ai i le Paeaiga lea na tea nei, o lea na ia silafia lelei pepa ia ua avatu e fautuaga ai e ia Le Ao Mamalu o le Malo. Ma na pau lava lena o le sui e mafai ona ia suia i lalo o lana fautuaga, talia le Tulafono Tau Faaofi lea ua pasia mai le Palemene, po o le le talia. E leai lava la se alofaga a le sa avea ma Palemia e na te le silafia ai le mea lea. A o lea ou te vaai atu i le Lipoti, e le o oo i ai le suesuega a le Komiti.

Na pau lava lena o le mea na ou tulai atu ai Afioga, ae o lea ua ou faasao atu, for your eyes only, e i ai le mea palapala lea na fai, ma e leai foi se fesetaiga na pei e faaleiloa, na silafia lelei ia fesetaiga ia. Ma le faaaloalo.

FOFOGA FETALAI: Ia, masalo lau Afioga i le sui usufono mamalu o lea... Onosai mai lava lau Afioga i le Taitaifono se i faalautele atu le... ia, e talitonu lava lau Afioga i le sui usufono mamalu, o lea foi ua tuu le avanoa i le Malo ina ia faalautele pea ina ia manino atili, aemaise lava o le fesoasoani atu leaga o lea ua oooo le saunoaga i le Taitaifono.

Mo le silafia e lau Afioga, o oe foi o se tasi o sui usufono matua o le Maota lenei, e pasia loa le Komiti o le Fono Aoao, e le mafai ona toe fesiligia e se sui usufono. O le mea lena ou te faamalamalama atu ai i lau Afioga i le sui usufono matua o le Maota Peseta, e le mafai ona toe tautalagia le Taitaifono ua uma ona pasia e le Palemene lenei. Ma e le na ma le laina na oo mai foi lava tusi ia te au a o faatino le galuega lenei ma sa ou toe tali atu foi i le tusi na oo mai a le Taitai o le Itu Agai e faamanino i ai le tulaga lea, ona e leai se malosi o ia po o au e toe suia ai le Taitaifono, o le Taitaifono na tofia e le Palemene.

O le mea lea lau Afioga i le sui usufono mamalu, ia aloalosa lau saunoaga e agai i le Taitaifono, ona o lea ua maea ona faia le faaiuga, ma le isi mea...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ou te tulai ma le faaaloalo...

FOFOGA FETALAI: Onosai mai lava le Sui Taitai o le Itu Agai se i uma atu le tala a le Nofoa.

Tofa Hon Lauofo Fonotoe Nuafesili Pierre Lauofo: O se mea lea e fia faasao faamolemole.

FOFOGA FETALAI: Onosai mai lava se i uma atu le tala a le Nofoa. Ia outou silasila mai i le Nofoa, o lena tou te malamalama i le Tulafono Tumau, a fai se tala a le Nofoa, onosai mai se i maea lelei. E le i uma le faamatalaga a le Nofoa i le mataupu lea sa laga mai e Peseta. O lea foi ua taua nai suiga laiti ia pei ona taua na tau ai le vaega o le Tulafono Tumau 113, o lo o manino lava i le Lipoti lea na tuuina atu i le Taitaifono ma le latou Komiti, e le i uia e le Failautusi sa i ai i lena taimi le vaega lea o le Tulafono Tumau 113, ona o mafuaaga e pei ona i ai le Komiti. A o mea uma lava, na asia uma lava e le Komiti. O lea e tau fesoasoani atu ai mo le faafaigofie o lou finagalo lau Afioga i le sui usufono mamalu.

Ia, tulai mai lau Afioga i le... Onosai mai se i tulai mai se i tulai mai le Afioga i le Sui Taitai. Ia se i tulai mai lau Afioga i le Sui Taitai o le Itu Agai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ia, leaga e tatau ona ou tulai atu i si vaega lea sa afea i le saunoaga a le Afioga i le Minisita ia Olo, leaga o lea e tuuaia ai le sa avea muamua ma Palemia ia o le Taitai foi o lenei Itu, leaga e le o nofo atu i i. Lea e tuuaia sa silafia uma nei mau mea ma tulaga uma. O le ala o mea e silafia uma lava e le Kapeneta ma le Palemene mea uma, i latou uma lava e silafia. E silafia foi e le Ofisa. O le mea foi lele e tuuaia faapea na o ia lava e na iloa nei mea, a lea e manino lava le Lipoti a le Failautusi. O tulaga na o le tulai atu, leaga e le mafai ona tali atu le e le o i i.

FOFOGA FETALAI: Ia, ou te tau fesoasoani atu... ia o lea ua maua lou finagalo.

Ia ne i te i foi ua... se i tulai mai lau Afioga i le Minisita mo Galuega, ne i te i ua faauigasese e le Sui Taitai le uiga o le saunoaga a le Minisita. O mea uma lava ia na fai, e tatau lava ona ui i le sa avea ma Palemia e fautua ai Le Ao o le Malo, ae le faapea sa faatino e le sa Palemia. E pei o le mea lena ia manino.

Se i tulai mai lau Afioga i le Minisita ina ia faamanino lea itu.

Tofa Hon Olo Fiti Afoa Vaai: Lau Afioga i le Fofoga Fetalai, o le agaga tonu lena na ou tulai ai. Ma o lea lava e manino i lalo o le Faavae 60 lea, ua soli Faavae le mea lea. I lau tulai atu ma le faaaloalo, a foi o pepa uma lava, o le mea lena ua ou teena ai le Tulafono lea, o le fautua e le Palemia o Le Ao o le Malo. Aua a le avatua le fautuaga e le faamaonia maia Tulafono ia.

A o le tulaga lea lau Afioga i le Fofoga Fetalai ua tulai mai le Sui Taitai i le le nofoia o le Afioga foi sa Taitai aua o lea ua faamuta atu faale a... mo se taimi. Ia, o le fesili; na fai lava le faaiuga ia maua o ma nofonono mai tua, ma faalogologo mai ua faagafua nofoa o sui usufono ia e lua, ma te le i saofafai i ma nofoa i o. O fea la le sao? Ma le isi mea, o sui usufono o le Palemene, se e le avea ia i le Tulafono lena. La e manino le Standing Orders, na o e e le o ni faipule e mafai ona sao so latou leo i totonu o le Fono lenei. A o le sui usufono latou, pe le i ai pe i ai, e alu lava ma faaauau Tulafono ma galuega a le Palemene. Ma le faaaloalo.

FOFOGA FETALAI: Faafetai. Ia, tulai mai lau Afioga i le...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o si mea laitiiti lava lea e fia faamalamalama.

FOFOGA FETALAI: Ou te iloa lau Afioga i le Sui Taitai o le Itu Agai ua tele avanoa ou te avatu, a o lea e te finau mai lava o le mea e tasi. E i ai se isi mea fou?

Tofa Hon Lauofo Fonotoe Nuafesili Pierre Lauofo: Ia, o le mea lea, aua o lea e manino, ona o la e aumai e le Afioga i le Minisita fai mai o le sa avea ma Palemia, le Taitai o le Itu Agai e fautuaina Le Ao o le Malo e sainia... e le faapena le faiga o le tatou galuega. O le tatou galuega e pasia loa le Tulafono i totonu o le Maota lenei, ave loa e saini. E leai nisi fautuaga e toe avatu i ai i o i Le Ao o le Malo, e avatu loa lava saini loa.

FOFOGA FETALAI: Ia, o lea ua manino. Se i tulai mai le Afioga i le Minisita o Galuega.

Tofa Hon Olo Fiti Afoa Vaai: Lau Afioga, e sao ai le saunoaga a le Afioga i le Tamaitai Palemia, o le Loia. Ae a silasila i le Faavae i le Fuaiupu 60, lena e i ai i ina le taiala e taialina ai le faiga o tatou Tulafono, pasi atu i i, avatu i le Ofisa o le Fono e toe tilotilo ma tapena uma mea, tapena loa tusipasi faamauina foi lea, o ai e ave i ai? E ave i le Palemia na te sainia ma ave loa lana fautuaga i Le Ao Mamalu o le Malo. O lena e manino ai, e fautuaina e le Palemia Le Ao Mamalu o le Malo ae le i faamaonia se Tulafono. Ma le faaaloalo.

FOFOGA FETALAI: Ia, ou te iloa o lea ua manino lea mataupu. O le a... saunoa mai lau Afioga i le sui usufono mamalu, faaauau mai lau saunoaga, o lea ua fai atu le tala a le Nofoa faamolemole i tulaga ia.

Afioga PESETA VAIFOU TEVAGAENA: Lau Afioga i le Fofoga Fetalai, se i faamanino atu lava le vaega lea, e le mafai ona aloese lau lauga e le i manino le vaiulu lea, leaga na tupu ia te au. O le ala lena e ala ai ona ou taumolimoli atu le vaega lea, ou te teena ai le Taitaifono o le Komiti. Na aveese au ma le Minisita Lagolago o Tupe ona o le lauga a le Minisita. O lea e afio mai Olo a o nofo atu i i, ona o la e silafia lelei e le Afioga foi i le Minisita i lena vaitaimi, o lea ou te i lalo o le Minisita o Tupe, a o lea e iloilo ai i i faiga faavae o mea o tauofoga ma galuega tetele. Ia e le tau... O le ala la lena na ala ai ou aveese ai au, fai i le amiotonu le Tulafono, e tatau ona ou faasee ese ae tuu le avanoa. O le mea foi lena sa tatau ona fai e le Taitaifono, alu ese ma le Komiti, o le amiotonu lena a le Atua. O lea la ua aumai nei le mea lea, ua personal tele le aumaiga o le Tulafono.

FOFOGA FETALAI: Ia alala mai lalo le sui usufono.

Tofa Hon Olo Fiti Afoa Vaai: Lau Afioga i le Fofoga Fetalai, o le mea e fia faasao ma faamalamalama. E eseese mamao lava mea ia e lua. O le galuega ma le faapea o fai se pisinisi a le Taitaifono, e pei lava o tatou, o lena e fai lau konekarate, o lea foi e fai si au sefe panikeke tulou le Maota. O ituaiga pisinisi ia o lea e aafia uma ai tatou. A o le mafuaaga na ala ai ona

ou tulai i lēna taimi e aveese sui ia e lua sa i totonu o le Tenders Board, ona sa oulua i ai i totonu o le Tenders Board, ae tofū oulua ma le konekarate. O le mafuaaga lēna lea na ala ai ona ou tulai, o lea na oulua afifio ese ai. O mea o la e iloilo ai mea fai pisinisi, ae oulua saofafai ai ma le sa i ai i totonu i ina. O le tala lēna. E eseese lava mea ia e lua mo le silafia e lau Afioga i le sui usufono mamalu.

FOFOGA FETALAI: Ou te iloa lau Afioga i le sui usufono mamalu o lea ua manino. Ma ou te le manatu foi e taitai sese le Maota i le tulaga lea e te talanoa mai ai, o lea ua manino le saunoaga a le Minisita, o lea foi e malamalama le Nofoa. O le mea lea, see ese ia lau saunoaga i se manatu taua mo le tatou Lipoti.

Afioga PESETA VAIFOU TEVAGAENA: E na o si mea lea lau afioga, leaga e lelei lou see ese, ae ua malamalama le Maota, leaga o lea na avatu le talosaga a le Itu lea i le afioga i le Taitaifono, leaga o ia sa alu e fai lana molimau tetee i le taimi e le i talanoa ai le Tulafono. E le tataua la ona toe nofo i i, e fai se faaiuga aua e le amiotonu.

FOFOGA FETALAI: Alaala mai i lalo le sui usufono se i fai atu le tala a le Nofoa. O lea o le a oooo i le mea ua uma ona fai i ai le faaiuga a le Fofoga Fetalai ma le Maota lenēi. O le tulaga lea e te tau aumai, o le tulaga o le taimi e le i faipule le Taitaifono, e manino lava lēna mea. E ese foi na taimi, ese le taimi ua tofia ai e avea ma sui usufono ma tofia aloaia e le Palemene. Sa tataua i lēna taimi ona faaali mai se tulaga faapena, ona e eseese taimi. O le mea lea, o lea e manino lava ia mea, e eseese mamao lava ma le mea lea na aveese ai lau afioga, i le Tenders Board, o le Komiti lea, o le Komiti filifilia a le Palemene, o lea na tofia e le Palemene.

Se i tulai mai lau afioga i le Taitaifono mo le faamaninoina o le mea lea...

Afioga Auuapaau Mulipola Aloitafua Mulipola: Lau Afioga i le Fofoga Fetalai faafetai mo le avanoa. E leai se agaga ia te au e faalavelave i le saunoaga matagofie a Faasaleleaga 5. Ae pau lava lea, mo le faasaoina o le taimi o matou o le Komiti ma au o le Taitaifono, se i ou faatali lava i se taimi mulimuli e ao ai le Malae i finagalo o le Maota lenēi. E aofia ai ma lou finagalo lea ua e taua le vaega lea. Ma ou te le apaapa foi i le vaega lea ua saunoa i ai le sui usufono mamalu o Faasaleleaga 5, i le teena o au. E sau se taimi ona ou ao lea o le Malae ona ou tali lea i le tulaga lēna. E leaga o le tulaga e le faavaea e le o taua i totonu o le Lipoti a le Komiti lea.

O le mea lea, se ou te fiafia lava i le saunoaga, ua fai ma su o ou ivi le saunoaga i lenēi taeao. O le faafetai atu lea lau Afioga i le Fofoga Fetalai. Ae aouliuli sau se taimi, ona ou ao lea o le Malae, ona ou tali manino atu lea lau Afioga i le sui usufono mamalu. Ma le faaaloalo faafetai.

Afioga PESETA VAIFOU TEVAGAENA: Ua malo faafetai i lau Afioga i le Taitaifono.

FOFOGA FETALAI: Le tatou Lipoti...

Afioga PESETA VAIFOU TEVAGAENA: O lea o le a ou see ese i le vaega lea. O le measili o lea ua manino le avatu o lau tuualalo i lau Afioga i le mea e tatau ona fai.

A silasila i ai i le Lipoti o lea e manino i i, o lo o faapea mai, e i ai kopi e feeseeseai ma isi kopi, le kopi lea na ave i Le Ao o le Malo ma isi kopi o le Tulafono. Ona ou manatua lea o se tasi o la outou Vaega, lea na manao e lui au i le palota. E tiga ona iloa e le mafai ona alu i le palota, uma le palota e le i alu, ae alu molimoli au i le Tulafono, e talu ai, e ese pepa ia e aumai i le Ofisa o Faamasinoga, ese pepa ia e nofo ma au i le lipoti a Leoleo. E tutusa lelei ma le mea lea e fai ai finauga nei, i le eseese o Lipoti nei. Ae na fai lava i le avafatafata ma lou loto faamagalalo i le mea lea.

FOFOGA FETALAI: Se i tulai mai le Minisita po o le a se....

Susuga Hon Laauli Leuatea Polataivao Fosi: Lau Afioga i le Fofoga Fetalai, o le apaapa lava i tatou Tulafono Tumau, leaga o lea ua tatou oo tonu i le mea lea o le aafia o tagata i fafo e le mafai ona tali mai. Pe e te le i taua le suafa o le na tuu e te lua tauva, o la ua iloa e Samoa, o le tagata lea e te saunoa i ai. E le mafai ona tali mai Vui Masina i le mea lea, finagalo malie le sui usufono, e le mafai ona tali mai le ua e saunoa i ai i le taeao lenei, leaga e i ai lou privilege i inei. E malilie ia i le tatou Tulafono Tumau, e na ona apaapa atu lava.

FOFOGA FETALAI: Ou te talitonu o oe foi o se tasi o sui usufono matua, ua e malamalama lelei i tatou Tulafono Tumau, o lea ua saunoa manino le Ministia. Ia faauma mai lau saunoaga.

Afioga PESETA VAIFOU TEVAGAENA: E le o auai mai le sui.... a lea e afio mai le Tamaitai Palemia. E leaga sa aafia i le saunoaga a le Tamaitai Palemia, taimi faatoa uma le palota, tuuaiga e faasaga ia te au. O le ala lena na avatu ai le mataupu lenei, e tai tutusa lelei ma le mea lea e uiga i le Lipoti lea, o le eseese o pepa e aumai i o ma o.

FOFOGA FETALAI: Ia onosai mai, se i saunoa mai lau Afioga i le Tamaitai Palemia.

Afioga Hon Fiamē Naomi Mataafa (Palemia): Ia faafetai lava i lau Afioga i le Fofoga Fetalai, e faatalofa atu i le mamalu o le Maota. E na o le

pau lava le mea e matauina. E talu ona saunoa le sui usufono mo Faasaleleaga 5, e talanoa i isi mea ae le talanoa i le mataupu lea e aumai ai le faamoemoe o le Maota. O le aumai o pepa i isi itutino o le Malo, lau Afioga e le aoga. O lea tatou te talanoa i pepa o lea sa faasolo i totonu o le tatou Palemene lea na fai ai suesuega a le Komiti. Ia faamolemole ia lau Afioga i le sui usufono, soia le faia o lena amio o lou tataisolo, ae saunoa mai i le tatou Lipoti. A e le talia le Lipoti, lelei e leai se mea e afaina ai.

FOFOGA FETALAI: Ua manino mai lau Afioga i le sui usufono mamalu. Ia se tatai lou finagalo i le tatou Lipoti ma le umi. E toe lua minute o le sui mamalu.

Afioga PESETA VAIFOU TEVAGAENA: E momoli atu lau faafetai i lau Afioga i le Palemia, ae pei o le agaga lena na ala ai ona ou avatu le tulaga lea, ona o lea e sau i la outou Lipoti le eseese o kopi, o faamaumauga i totonu o kopi nei. O le ala lea na ou avatua ai le mea lea, e tutusa lelei lava ma le lipoti lea na alu le sui lea na tuu e alu, alu aumai i o, eseese le lipoti a le Ofisa o Faamasinoga, ese le Lipoti a Leoleo, na mafai ai ona ou alu i le Faamasinoga. O lea na iu lava ina ave le mataupu i le Faamasinoga, ae faafetai i le Atua, o mea lava e fai e le Atua. E valaau le faamasinoga o lea e nofo mai le alii faamasino na faia le Faamasinoga lea, o la e silafia lelei e alii faamasino, na solofua le moliaga. A o le lipoti lea na sau ma le sui o la outou vaega, e faamaonia moliaga. O fea la le amiotonu o nei mea...

FOFOGA FETALAI: O le sui usufono mamalu, masalo o lea ua tautalagia soo le tulaga lea i lau Afioga, e eseese mea, e eseese le faiga o lipoti o le taufetuli i faiga palota, ese le lipoti lea o Tulafono, e matua valavala lava i Sini, vaeatu le paia o le Maota. Ia agai sao i le Lipoti lea e talanoaina.

Afioga PESETA VAIFOU TEVAGAENA: Lau Afioga, ona avatu ai lea o sou manatu i le Lipoti. O lea ua uma ona saunoa le Tamaitai o le sa avea ma Loia Sili, ua uma foi ona saunoa nisi foi sa malie e tuuina mai a latou molimau. Ma o lea ua matua mautinoa i i, i le Lipoti, ua faatamala le Matagaluega o le Fono, ua faatamala le Matagaluega o le Fono. A o lea e taoto le tatou Tulafono Tumau, a i ai le mea e faaletonu ma ni mea e feeseeseai ma ni mea e aveese, o le ave i Le Ao o le Malo, fai se pepa e ave e toe saina ai Le Ao o le Malo, o le a le mea e le faatino ai lea mea. Sa ou faapea e aumai le fautuaga a la outou Lipoti, e toe aumai i le Palemene se pepa e ave, e toe fai ai le mea lea, tou te fai mai, o lea e i ai nai mea e faaletonu. A o le agaga o lou nei sui usufono, e matua ou teena lava le Lipoti lenei, ona o vaega ia ua ou avatua. Ma lou faaaloalo lava i lau Afioga i le Fofoga Fetalai, manuia le Fono.

FOFOGA FETALAI: Malo faafetai o le measili lea ua aumai le saunoaga, o lea foi ua faamauina lou teena o le Lipoti, ia malo lava faasoa, atonu e aoga foi le talatalanoa mai, ma faailoa atu foi e le Malo ina ia manino pea le tatou mataupu, ina ia tatou talanoa tonu lava, i le taua foi o lenei Lipoti ua aumai i luma i le Palemene.

O le mea lea e le itiiti le taua ma le aoga o lenei foi Lipoti, aemaise o le faaiuga a le Palemene ina ia filifilia se tatou Komiti ina ia silasila aua le agai i luma o le tatou Faamasinoga o Fanua ma Suafa, o le taua lena. Ae faafetai o lea ua fesoasoani atu foi lo tatou Malo, i nai itu foi e ao ona tatou mafaufau atili i ai.

O le avanoa lenei o le tatou Maota, o lea ua matau atu o lea ua fou mai le sa o Vaisigano 1. Ia tulai mai le Afioga i le sui usufono mamalu.

Afioga NIUAVA ETI L. MALOLO (Vaisigano 1): E faafetai i lau Afioga i le Fofoga Fetalai mo le avanoa e faaleo ai foi se manatu o lenei foi itumalo o Vaisigano 1, aua foi le Lipoti, o lo o faapea ona taoto i le Palemene.

Lau Afioga i le Fofoga Fetalai, e manatu o lea ua e sisi le atumua, ma ua tafi toelaua mauga o Salaia. Ua lealea ao nai Gagae, ae soloitua ao nai Gagaifo. Ua togoleleia le malama, ua gafoa ata e pei o le upu ia Paiatea ma Paialala. Ua pati taoto le Feepo ua to le pule i le alofa o le Atua, ua patilima i tatou o tagata soifua.

E faatalofa atu i lau Afioga i le Fofoga Fetalai, e faatalofa foi i lau Afioga i le Tamaitai Palemia, le sui Palemia, aemaise foi o le Kapeneta ma Minisita Lagolago. E faatalofa foi i lau Afioga i le Sui Taitai o le Itu Agai, sui mamalu o le Palemene o Samoa.

E faatalofa foi Samoa mai le taisamasama o le Tuimanua, seia paia File ma Puletuu na tauilo ai manu o Malo.

E faatalofa foi i le faigamalo a Tutuila ma Manua. Ae maualuga le faatalofa i le aufaigaluega tofofi a le Atua. Lau Afioga i le Fofoga Fetalai, ou te faatalofa foi i si ou itumalo i la outou tapuaiga, ae o le a agai se manatu i le Lipoti ua taoto i le Palemene.

E muamua ona faaleo se lagona o le agaga faafetai i lau Afioga i le Taitaifono ma le mamalu o le Komiti. E ui lava i la matou matau i le fita ma le siisii o le tai i le faatinoga o la outou galuega, a o le mea faafetai o lea ua i lumamea le Lipoti. E ui lava i le matau, e le i saina nisi o le Komiti ma ua aumai ai se fesiligia o lenei atoaga, ae manatu o le a oo i ai se tofa a le Palemene, i se taimi mulimuli.

Lau Afioga i le Fofoga Fetalai, o lau matau ua fesiligia le mamalu o le Fono Faitulafono. O le fono na te pasia Tulafono ma suia Tulafono. A o le a le matau? Ua mamasagia le fono na tofofi e Tama ma o latou Aiga, Aiga ma a latou Tama, Tumua ma Pule, Aiga i le Tai ma le Vaa o Fonoti. E mafua i se a se lagona? Ae ua manao lava le tagata ia e sui, ona sui lea. E le o se mea

itiiti i le matau a lenei usugafono lau afioga i le Fofoga Fetalai, o lea lava na fofola i le Lipoti, na savali mai le isi Faauluuluga e alu agai i le isi Ofisa. Na faatino ai le suiga lea. E le o se typing error, o fea le malosiaga o Tulafono Tumau e toe aumai ai le Tulafono i le mamalu o le Palemene. E tatau ona toe foi mai suiga ina ia nofoilo Taitai o le atunuu i le Tulafono. O upu ma laina ma vailaina, o le Tulafono o lo o taitaiina ai i latou, taitaiina ai le atunuu lenei. Talofa i le faigamalo ua mavae atu ma le Kapeneta, afai foi ua le fesiligia le Minisita sa tu mai i le foe, ae se i tepaina le Kapeneta, o lo o i ai le tofa loloto ma le utaga mamao e auala mai ai se lafo e faatu, e toe aumai ai nei suiga. E le o taua i le Lipoti, o lona uiga na mama ia i latou le faatofalaiga mai le Kapeneta a o le i tuuina le Lipoti i le Palemene.

Afioga Peseta Vaifou Tevagaena: Lau Afioga i le Fofoga Fetalai o se mea e fia faasao.

Afioga NIUAVA ETI L. MALOLO: Talofa i le Afioga i le Minisita, sa tu mai i le foe.

FOFOGA FETALAI: Se i onosai mai lava lau Afioga i le sui usufono mamalu. Ua uma lou taimi...

Afioga Peseta Vaifou Tevagaena: Lau Afioga i le Fofoga Fetalai, o le mea e fia faasao i le lauga a si ou uso a Minisita Lagolago. E leaga o lea e te saunoa mai, o fea le Minisita, o le a le taimi na le toe aumai ai le Tulafono. A e silasila foi lau Afioga o le Tulafono lenei, na pasi o le a uma le Paeaiga, ua lata i le taimi o le faiga palota, ua leai la se taimi e toe aumai ai le pepa i totonu o le Palemene. E fia faasao atu le mea lea ia au i ai lau sailiiliga.

FOFOGA FETALAI: O lea ua maua atu le agaga o le...ia onosai mai pea se i faauma pea le saunoaga a le sui mamalu ia tatou malamalama atili lea po o gafea tonu lea e agai i ai le sui usufono. Ona o avanoa ia e tuu atu i sui usufono mamalu, o avanoa taua, o lea foi e faafogafoga mai o latou itumalo i o latou sao i totonu o le Palemene. O le mea lea ia onosai mai tatou lea ua uma o tatou taimi, tuu pea le avanoa i sui usufono mamalu. Faaauau le saunoaga.

Afioga NIUAVA ETI L. MALOLO: E faafetai i lau Afioga i le Fofoga Fetalai, ua ou masani foi i aikia a tama matutua o le Palemene. E taumafai foi e faaluafesasi, ae a e mautu lava i le mea o lo o e talanoa ai, e agai sao lava lau lauga.

Ae talofa e i le Afioga i le Minisita sa tu mai i le foe, aua o le mea lea e saunoa i ai le sui usufono mamalu, ou te alofa foi i le sui usufono ua e matua i le Palemene. Ae afai na latalata i le faaiuga, o le a le mea na ala ai ona

tatope? O le a le mea na ala ai ona faatopelau ae le tuu i le isi fonofono? Ae talofa i le Minisita sa tu mai i le foe. O lea ua aliali ai i i, le leai o se faaaloalo i le Palemene. O le manatu faasausili, manatu mama ua sui lava i le malosi. E le o se faasiliaupule lea i le Palemene? O le a le aoga tatou te saofafai ai i i, pe a mafai ona sui i fafo atu o le Palemene Tulafono aua ne i toe aumaia i totonu. Talofa i lana Afioga i Le Ao o le Malo, Tuimalealiifano Vaaletoa Sualauvi II. O le faatumutumuga o le atunuu, a o lenei ua faatasina lona suafa ina ua pisapisao le atunuu, e ese le mea na saini ai lana Afioga, ese le mea o lo o i totonu o le Palemene, ese mea o lo o i luga o auala faatekonolosi. Talofa i lana Afioga, ua savea fua le maaveave le fua, ona o le tau faamatie o se finagalo o se tasi.

Lau Afioga i le Fofoga Fetalai, o le aao tuuina i luga ma le faamau faailoga a le atunuu mamalu o Samoa, ae ese le mea lea e i totonu. Ou te ofo. O fea le faaaloalo maualuga o Le Ao o le Malo? O fea le nofotuavae e maua ai le faateete ma le faaeaea i le Aiga Tauaana ae o lea e ese mea ia e ave i ai, ese mea ia e nana i i, ma tuu i i.

Lau Afioga i le Fofoga Fetalai, e le laititi aafiaga o mea nei, e le laititi. Aua o le mea mautinoa, o lea ua agai mai le uluulu o le laau i le faigamalo. O ai e totogia pe a omai aiga o nuu ma afioaga e su le faigamalo, i ni faaiuga na faia i luga o ni Tulafono e le i maea atoatoa ona tapena, ae topelau le tuufaatasiga? Ae o le mea e maniti ai le tino.

Lau Afioga i le Fofoga Fetalai, o measina a le atunuu, o measina a aiga, o measina i ina, o measina i o tatou aiga. Talofa ia Aiga ma Salafai, talofa i le taataavao o Tapumanaia, saili le Malo, talofa i le mavaega a Tagaloa matua i Tufu i Gataivai na mavae ai le falefagafua o Tagaloa, Gale ma Tuiasau ma le Falesafune o Safune le taufaasala. Talofa sa outou tali faaaloalo ma outou ioe i le Komiti ina afifio atu ma agai atu. Ma outou fale, aumai avatu i Faletagaloa, ae ua a nei? E ese lava le itulau sa outou silasila i ai ma faafofoga i ai, ese le Tulafono lea o lo o faamau faailogaina i Samoa.

Lau Afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai ma le faaaloalo sina vaega lea e fia faamalamalama.

FOFOGA FETALAI: Ua e tulai mai i le tulaga faa-Taitai?

Tofa Hon Lauofo Fonotoe Nuafesili Pierre Lauofo: E faauilavea i le saunoaga. O lea ua oo i le tulaga foi lea o le Komiti lea sa o e ave le Tulafono Tau Faaofi i le atunuu, o le taimi lena e le i mautu le Tulafono, o la e ave e faatalatalanoa e aumai fautuaga. A lea e nonofo atu isi sui o le Komiti sa i ai, e faatalatalanoa, aumai ai lea o fautuaga e fau ai i le Tulafono faaiu e aumai i totonu o le Maota, e i ai teuteuga. A o se ata faataitai na ave e faasavali i le atunuu, e le i pasia ma ave ma Tulafono i le taimi lena.

FOFOGA FETALAI: Ia faafetai o lea ua maua lou finagalo. Ou te talitonu foi o lau afioga i le sui usufono.

Afioga Hon Tapunuu Niko Lee Hang (Vaimauga 3): Lau Afioga i le Fofoga Fetalai...

FOFOGA FETALAI: Ia se i saunoa mai.

Afioga Hon Tapunuu Niko Lee Hang: E faafetai mo le avanoa, leaga o lea e taua i le saunoaga matou le Minisita talu ai, e foliga mai o se tuuaiga e aafia uma ai Minisita o le Kapeneta. E i ai le faaupuga faa-Samoa, e mau foi o e faalele ma sausau, ae i ai foi le au matau. O lea ou te nofonofo ma matau i le saunoaga a le sui usufono, ma e faanoanoa lava i ituaiga saunoaga ia, o le mafamafa mai ma tuuaia ai Minisita ia e le o toe i ai i ma tulaga faapena, o faaeteetega lava ia. O lea e saunoa mai i e e le o i totonu i i, e le mafai ona tali atu, e pei foi o lea na saunoa atu ai le Afioga i le Sui Taitai, e le o afio mai i i le Palemia, a o lea lava e fai mai faamatalaga. E pei o le tulaga lena lau Afioga, ae le fia faalavelavea le saunoaga matagofie a le sui usufono mamalu.

FOFOGA FETALAI: E taua foi le fautuaga a le sui usufono, leaga ua taua foi le faigamalo ma Minisita ua tuanai. Ia tatou talanoa pea i lenei taimi ua taatia ai le tatou Lipoti ma agai pea i luma le tatou talanoaga i le fautuaga ua aumai. E popole foi le Nofoa i le taua o itu ia, e pei ona saunoa le sui usufono mamalu, o e foi sa saofafai i le Kapeneta. Ia e i ai le agaga faapena, ina ia mamalu pea a tatou upu ma tala i totonu o le Maota, ma tatou teu mamalu foi i e foi ua tuanai. E manatu faapena lau afioga i le sui usufono, agai pea i le tatou Lipoti ma le taunuuga ma e na faatinoina ma e o lo o faasaga i ai le tatou Lipoti. Ae manatu faapena, o lena ua manino ina ia faapena ona faamama foi i le faafogafoga mai a le Maota ma le atunuu. O mea ua tuanai o lea ua maua e le Lipoti, e talitonu ua le toe pogisa o lea ua manino mea uma. O le fesoasoani lea i le sui usufono mamalu. Ia faauma mai lau saunoaga.

Afioga NIUAVA ETI L. MALOLO: E faafetai i lau Afioga i le Fofoga Fetalai, e leai lava se agaga e i ai foi se tuuaiga, o le agaga o lea e avatu i ai le lagona o le amanaia o sui usufono mamalu o le Palemene, o le agaga lena. Ae leai e laualuga foi le faaaloalo i e na nofoia. Ia ou te faamalulu atu i le itu lea i Afioga i le Itu Agai pe afai ua ese foi i le matau. A o le agaga lena o lenei foi sui usufono, o le nonofo i le Palemene, ae sui i tua e aumai ai se lagona e le o amanaia la outou Fonotaga mamalu, e pei o le agaga lena.

Lau Afioga i le Fofoga Fetalai, o le vaega lea e fia mamafa i ai se tala, e i ai le manatu o le saunoaga foi a le Tamaitai Palemia, ia sei ma aa, o le lagona

lea o le faatamala o le aufaigaluega. O i ina lea e tau avatu ai se lagona, ona e popole le sui usufono lenei i measina a le atunuu. Ae manatu e manaomia ni tagata e talitonu i le tiute ma le valaauina e fai ai i le atoatoa e faavae i luga o le Atua ma lana principles e agai i ai.

Lau Afioga i le Fofoga Fetalai, o nei e faatonufofola ai taeao. A tatou le faia foi le mea amiotonu nei, e le amiotonu foi taeao. A sese loa le aso, ua tatou alu sese ai taeao. Lau Afioga i le Fofoga Fetalai, talofa foi i nai tamalii, i nai failauga, talofa i le Ofisa mamalu, fanau uma sa aafia i lenei galuega ma suiga. Talofa i le tagata na faia e le Atua ma le faatusa o le Atua Silisili Ese. Ua ou toe manatua ai le tagi a le teine Salemuliga, fai mai ua fasia lava si ana tama, a o fea le vao o tagata? O fea ona aiga, a o fea o i ai le siosiomaga o ona ofisa? O fea o i ai ona aiga se i fautua ane, ma tuu ane se tuualalo? Se i tanoa ane ma tuumumusu ane, ua leai lava.

Lau Afioga i le Fofoga Fetalai, o le alofa e fetafeai e pei o le vaitafe, i totonu o tatou tino. O tatou o tagata kerisiano tatou te ola faamagalalo ae peitai o le mea tonu ma le mea amiotonu e tataua lava ona faatino, aua o le toto o le aano, o le uo o le aumeamamae nai nei foi tamalii. E le i fesiligia foi le tautua a nei foi tamalii, o lo o maua i lenei Lipoti i le tautua ma le faavaega ma le development o le atunuu lenei o Samoa, e tele le aoga o nei tamalii. Ae talofa, talofa i le fili ma ana au, semeamanu le lupe na faia i le fuifui na maua ai lenei sasi pe afai e laititi i se faatofalaiga a se isi.

Lau Afioga i le Fofoga Fetalai, e le o se mataupu e taligofie i lenei usugafono lenei mataupu, leaga ua aafia le Faavae o Samoa. Ma e matuai lagolagoina e lenei usugafono le Lipoti a le Komiti.

Ia manuia lau Afioga i le Fofoga Fetalai, manuia foi le faigamalo, manuia foi lau Afioga i le Sui Taitai o le Itu Agai, aemaise foi o le Itu Agai, faafetai. Manuia le usugafono.

FOFOGA FETALAI: E faafetai i le sui usufono mamalu, o lea ua faailo lou finagalo e tusa o le Lipoti. Malo faafetai. O le avanoa lenei o se tasi o sui usufono. O lea ua matau atu ua fou mai le sa o Salega 1, tulai mai lau Afioga.

Afioga FEPULEAI FAASAVALU FAIMATA SUA (Salega 1): E faafetai mo le avanoa i lenei taeao fou ma le usugafono mamalu. E tulai foi e fai se upu a le sui o lenei usugafono mai le Itumalo o Salega. Ou te faapai atu foi i le tapuaiga mamalu a Samoa mai lava i lana Afioga i Le Ao Mamalu ma le Masiofo, Sui o le Fono o Sui Tofia ma le faletua, tainane lau Afioga i le Faamasino Sili ma le Vaega o Faamasinoga. E faatalofa atu foi i lau Afioga i le Tamaitai Palemia, le Sui Palemia, aemaise le mamalu o le Kapeneta. E faatalofa atu foi i lau Afioga i le Sui Taitai o lena Itu ma le mamalu o le usugafono o le Palemene mamalu a Samoa.

E le faagaloina foi le tapuaiga a le aufaigaluega tofofi a le Atua i totonu o le tatou atunuu, faapea foi le Peresetene a le Koneferenisi ma lana Laulau-a-Fono, le mamalu o le nofoaiga i Nofosea, Failautusi, aemaise le mamalu i le Peresetene o le Auuso Fealofani, ma le Auuso Fealofani o le Ekalesia Metotisi. E faatalofa atu foi i le tapuaiga a le tapuaiga i le susuga i le Taitaifono ma lana Laulau-a-Fono le Ekalesia EFKS ma le mamalu o le nofo a too, Susuga i Toeaina Faatonu, Toeaina ma le mamalu i Pulega taitasi ma Matagaluega.

E ao foi ona faatalofa i lau Afioga i le Moseniolo, aemaise le nofo a Patele, Felela, Taupousa, le paia i Failauga, Tiakono ma Fesoasoani ma faletua e oo lava i le loaloa o le Ekalesia.

E faatalofa atu foi i lau Afioga i le Taitaifono o le Ekalesia Faapotopotoga a le Atua aemaise o le Sui Taitaifono, le tama faaleagaga ia Pou Tuigamala. E momoli atu alofaaga e tusa ma le valaauina ma le tofiga a le Ekalesia.

Ae le faagaloina le tapuaiga a so o se fatafaitaulaga ua le maua i totonu o Samoa, aua lou fatuaiga tausii e te tulivae gau i le Atua i le po ma le ao, ao ma le po, e sema se manuia mo Samoa ma ona tagata.

Ae se i ou faatalofa atu ma faafeiloai atu i si ou itumalo o Salega 1, ma ofo alofa atu. Faafetai i lo outou lagolago e ala i polokalame o le Fua i le aso ananafi. Ua maua foi i luga o auala o fesootaiga lo outou lagolago i le Polokalame a le Afioga i le Taitaifono ma le mamalu o le Komiti i tapenaga o le faailogaina o le 60 tausaga ua faasaoloto mai ai Samoa mai pulega.

Ia o lenei vaega o le taeao, e fia lagona foi se leo o Salega i lenei mataupu na iloiloina e tusa ma le Tulafono. Na ou manatu lava i le taimi na foafoa ai le malaga a Isaraelu, ua agai i le vao, o le ata o le vao o le ata o le le mautonu. Na aumai ai e le Atua o le ao faaniutu ma le afi faaniutu e taitai ai Lona nuu i le ao, taitai ai Lona nuu i le po. Mulimuli ane o le a oo i le nuu ae fai mai le Atua ia Mose, sau i luga o le mauga se i avatu le Tulafono e fai ma taitaitama o Lona nuu na Ia filifilia. Na alu alu le galuega i le taitaiga o le Tulafono, e le faigofie le galuega taitai. Fai mai le tama o le ava a Mose, ua mamafa lau galuega, tofofi ni taitai, tofofi ni faamasino, tofofi ni alii taua e fesoasoani i le galuega ona faapotopoto loa lea o e fai le galuega. E faapena se vaai a Salega i le taitaiga o Samoa. Na tatou folau mai i le fefulituaai ma le feainai ma le fetauai e saili se Tupu. Ae fai mai le Tupu Tamaitai, talofa e, Sua ma Malietoa, ua lua Susu mai ua uma atu, ae taliilagi se ao o lo ouluu Malo, taunuu le uluai la e folau ai Samoa i lana talalelei.

Ua alu alu, o sailigamalo a ni outou tuua ma ni o matou matua, lea na faavae ai le Malo Tutoatasi o Samoa i le 1962, na fau ai i ina le Tulafono Faavae na tofofi ai i ina le Palemene e taitaia au upufai, Samoa ma lou Malo. Totofi ai sui o itumalo taitasi, tofia ai le Palemia, tofia ai Le Ao o le Malo, faasinomaga mai le talalelei a le Tusi Paia, na sosolo ai lava Samoa. A lea sa tatou faailogaina i le aso ananafi, na e toe silasila ai ae sisi le fua o le tagavai o lou saolotoga.

Ou te manatua le tala faa-Samoa, fai mai afai o lou sa folau o le Tulafono e fai ma taitaitama, fai mai le faauigaina e Salega, a mamaioa mamaitaloa lou sa folau, o le fesili; e faapefea ona puluki, e faapefea ona toe fai le mama lea ma le tae lea? Ona ou manatua loa lea o le upu lea o le malali. O le malali, e fau mai le fua o le laau lea o le ifi, aumai lea ona olo lea i le lapa, e talatala, e maosiosia le ifi. Ona aumai loa lea o le mea lea o le peniuli i lau ologalaau ma lau telegalaau ona lomi faatasi lea ma le ifi lea, ona tau loa lea o le malali. O le laulua ma le pu o lou sa folau, ona avatu loa lea o le malali lea taumafai e puluki ai. Ae i ai le Tulafono o le faiga o le mea lea. Fai mai toeaia, o e faamama le tae le la o le vaa, salu ese le palapala, faamama lelei ina ia avatu le malali pipii lelei e le mafai ona toe ulufia le vai po o le suasami. Ae a le faamaoni le tagata e faia le galuega lea, ona le pipii lea o le malali i le vaa po o le sa folau. Fai mai lea o toeaia pe a mama le vaa pe a tuu i le gataifale, talofa e, ua taepulua le malali. Samoa ma lau Palemene i leni taeao, o lo tatou sa folau ma le taitaitama i lo tatou atunuu, o lau Tulafono Faavae, o lau Tulafono e taitai ai tatou. A o ai le malali? O ai e teuteua le sa lea? O le mamalu o lau Palemene, lau Afioga i le Fofoga Fetalai, lau Afioga i le Tamaitai Palemia ma lau Kapeneta, mamalu i le usugafono, o tatou o malali filifilia a Samoa e fonofonoina le mea lea.

Paga lea, talofa e, talofa e i Le Ao o le Malo ma lana tu i le too o Samoa? Talofa e i le Tamaitai Palemia ma lau Kapeneta ma le mamalu o lou faaaogaina, ua le faamaoni le tagata na teuina le tae lea, ua taepulua ai le malali. O le a le uiga? Ua aveesea le ta taua i totonu o le Palemene. E a taua e puluki le pu, teuteu mea o faaletonu o le sa, ae oso mai le alii o le lalolagi ua faaleaogaina le tatou galuega faifaatasi.

FOFOGA FETALAI: Ua ou vaelupeina le saunoaga a le sui usufono mamalu talu ai o lea ua tatou taunuu i le tatou taimi malolo masani o le taeao, ia atonu e oo atu i le tatou toe taliu mai ua tau faaiuu mai le saunoaga a le sui usufono mamalu. Ae malo saunoa.

Na faataatiaese Taulumaga a le Fono Aoao Faitulafono mo lana malologa masani i le itula e 10:45 i le taeao ma toe faaauau i le itula e 11:22 i le taeao.

FOFOGA FETALAI: Ou te faasilasila atu ua toe faaauau nei Taulumaga a le Fono Aoao Faitulafono.

E manatu ua maua se malosi faaopopo e faaauau ai le tatou galuega ina ua maea paleauau foi le tauteaga ma le taligasua a le tatou Maota. Faafetai i le Atua i Lana foai, faamalo foi i le tatou Ofisa mo le tapenaina o le taumafataga a le Palemene.

E faataatiaese le tatou Galuega mo le malologa o le taeao o lo o saunoa le sui usufono mo Salega 1. Ia, tulai mai le sui usufono mamalu e faaauau lau saunoaga.

Afioga FEPULEAI FAASAVALU FAIMATA SUA: Faafetai i lau Afioga i le Fofoga Fetalai, o lea foi ua maea foi le taligasua i le mamalu o le Palemene i lau Afioga i le Fofoga Fetalai, aemaise foi le Afioga i le Tamaitai Palemia ma lana Kapeneta, a ua maua foi se faasiligamalosi aua feau ma galuega o lenei aso.

Ae le i oo i le tatou malologa o faasolo atu lava nai lagona foi o lenei usugafono, aua le tapuaiga a si ou itumalo i tupu o le itu ma alii o le itu, aemaise le tausiga a Tuisalega ma lona pitofanua, ma le mamalu o le itumalo.

Oo sau faamatalaga lau Afioga i le Fofoga Fetalai i le tau faamalamalamaina o le uiga o le tatou sa folau ua afaina, ma e i ai lo matou talitonuga afai e taitaitama ma tatou folau i le Tulafono o aga faaletulafono, a malu le Tulafono malu le Faavae, e maopoopo foi ma mamalu pulega a tatou faigamalo. Peitai, ua i ai le ua oso i totonu, tulou, ma ua afaina e foliga mai ua foua le Palemene. E leai se eseesega ma le upu e masani ona lafo i totonu o nuu ma aiga, ua faasiliaupule, ua fiapule, a ua gaupule. Ua foua lau faaiuga. Talofa e. O le a le uiga o le mamalu o Samoa ua potopoto, ae sau se tagata se toatasi pe toalua foi e mimilo, mimilo, mimilo lau faaiuga? E lelei lava togafiti ae le umi. A o le fili foi o le tama o le maua. E sao ai le taitai o le isi Ekalesia, e pei lava o le a maua se isi. A lea ua tau mai e le Lipoti a le Komiti.

Faafetai i lau Afioga i le Taitaifono ma lau Komiti mamalu. E tele la outou galuega. I lau faitau ma lau matau ma lau vaavaai i laina ma vailaina o la outou Lipoti, ou te le talitonu i le upu lea fai mai o ni sasi. Ai se i vagana se tamaitiiti e le o atoatoa lelei sona mafaufau tulou, e mafai ai ona faaupu le mea lea o le sasi, leaga a sasi, e sasi se mataitusi pe sasi se upu. Ae i lau vaai i imeli ia na aumai, ma ou vaavaai i e na molimau i le Lipoti, na amatamea le isi suafa. Ia ou te le tau atua lea ua tatou iloa uma i le Lipoti. E ui lava o se isi foi itu, ae amatamea mai i fesootaiga, lele mai le ea i inei, lele atu i o. E nonofo i le isi fale i le isi fale ae felele mai luga o le ea fesootaiga. A o le mau tauave lea e i i ma le upu faavae lea ou te vaai i ai ma le upu taatele lea e i ai le imeli lea, lea foi e faamaonia mai e molimau, aveese mea ia, aveese ia, aveese loa, toe faafoi mea i tua. O, se ou te ofo. E i ai se malosiaiga faaletulafono fai mai e aveese mea ia? Aveese loa? O le faatonuga numera tasi ma leotele lea e fai, fai i le Failautusi sa i ai ma nisi sa i ai lea e tau mai i le Lipoti na omai fono faatasi, talanoa faatasi. Ave i ai le tala, aveese mea ia. Aveese loa. O lona uiga, o la e naunau e aveese. E le o se sasi la le igoa o le mea lea. E le o se sasi. A lea na tulai atu le Minisita ma fai mai, tau lava o oe. A lea e tau mai i i, tau lava na o ou mata a e te iloa le mea lea, na o oe lava. O lona uiga o la e manao e nana se mea ae tuu se isi mea i totonu? E le

se sasi la lea mea ia Salega. A ou te faatauaina le fautuaga a si ou faiaoga sa ou aoga ai...

Afioga Lupematasila Galumalemana Tologata Togia Tile Leia (Falelatai ma Samatau): Lau Afioga i le Fofoga Fetalai...

Afioga FEPULEAI FAASAVALU FAIMATA SUA: Fai mai lou faiaoga ia te au, a e matai aua e te matai faufau ae matai fuafua...

FOFOGA FETALAI: Se i onosai mai lava le sui usufono mamalu. E i ai se mataupu aua o lea e le i lauga lau... e i ai se taimi e te lauga ai...

Afioga Lupematasila Galumalemana Tologata Togia Tile Leia: Lau Afioga, e leai se agaga e faalavelave i le saunoaga matagofie a le sui usufono mamalu. Ae na o le pau lava nai vaega e fia faamalamalama ma tuu atu ai foi se tuualalo, ona o lea ua lua i i sui usufono o le la itu ua saunoa i le vaega lea, for your eyes only, a o lea ou te matau atu i saunoaga, o lea foi ou te vaavaai i le Lipoti, ia o le gagana lava ia sa faaoga e le Ofisa i talanoaga i totonu o le Ofisa. I lau la vaai i ai, ne i te i ua taitaiseseina le Maota ma le faafofoga mai a le atunuu, leai o le confidentiality lena o le mataupu lena i totonu lava o le Ofisa, ae le o i ai se agaga alualua faapena e pei ona tau aumai.

E pei o se vaega lea o lea ou te soso atu ai. Ma le agaga faaloalo.

FOFOGA FETALAI: Faafetai o lea ua maua atu le agaga o le faauilavea. Ia, atonu o le a tali manino i ai le Taitaifono e faamanino lea vaega ona manino ai foi lea o le paia o le tatou Maota. Ae saunoa mai lau Afioga i le sui usufono mamalu. Agai mai pea le saunoaga a le sui usufono mamalu i le nofoa faamolemole.

Afioga FEPULEAI FAASAVALU FAIMATA SUA: Faafetai mo le avanoa. O lea ua aumai foi se faamalamalama ma se tuualalo a le sui usufono mamalu. Ou te manatu e tofua lava le tagata ma lana ia faaliliuga, ae o lau ia faitau i le vaega lea, e mafai lava ona fai atu e fai se ta tonu, ou fai atu, na o oe lava e te iloina aua ne i iloa e nisi. E legal, o lona uiga, e private le mea, e le manao e iloa e nisi, i lau lea faaliliuga. E private, tau lava o oe ma au, aua ne i liki i tua. O lau lea faaliliuga i le uiga lea na ou tau faailoa atu. Ae pei o le mea lea na ou tau avatua, o le upu taatele lea e i ai i i le molimau lea, aveese. O le ala lea o lou fai atu e au ia ma lou talitonuga a lena usugafono, ou te le iloa o se sasi le mea lea. Leaga so o se imeli lava e sau, ae sau ai ma le isi upu lea. Faafetai i le Komiti, faafetai i lo outou maemae, faafetai i lo outou sailiili.

I tulaga o le Failautusi, ia o lea e fofola mai lava le Tulafono Tumau 111, e au i ai lou manatu, ana faapea e ui i tulaga ia, ia o ai se isi o la e toe afaina? E leai se lagona e mafai ona toe afaina se isi. Ae ona ua sese le mea ua fai, o le sasi lava o le sasi. O le ala lena na ou mafaufau ai i le tala a lou faiaoga na fai, a e matai, aua e te matai faufau ae matai fuafua, fuafua mea lelei. Leaga e te matai faufau loa pe te pule faufau pe te faipule faufau, tulou po o le a lou tulaga maualuga ae te faufaua se mea, ia ona ou ata laia lea i le faaiuga. Leaga e faapena le isi Tupu i le Feagaiga Tuai. Fai mai le tala a le Tupu lea, sau, o le a se mea lelei e fai i le tagata lea na galue lelei?

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o se mea e fia faasao.

Afioga FEPULEAI FAASAVALU FAIMATA SUA: A o le matai lea sa faua se laau tele lava e faatautau ai le tagata lea.... peitai ane ua...

FOFOGA FETALAI: Ia, se i fai mai se malologa a le sui usufono se i tuu atu le avanoa i le Sui Taitai po o le a se...

Tofa Hon Lauofo Fonotoe Nuafesili Pierre Lauofo: Ia leai o lea ou te tau vaavaai ma faitau i le Lipoti po o fea le mea o aumai ai nei mea tau faufau. E leai lava se mea tau faufau o ou vaavaai atu po o faitau ai i le Lipoti. Afai o lea e talanoa i le mea lea o le feiloaiga a le Peresetene o le Faamasinoga o Fanua ma Suafa ma le Ofisa, ia o tulaga masani lava. O lena foi e manino mai tusinga ma mea o fetalaiiga, e leai ni mea faufau, o la e ave i luga o le tulaga foi lea o le talosaga ma mea o fautuaga. Pei o le tulaga lea.

FOFOGA FETALAI: Faafetai. O lea ua maua le finagalo. Ia, o le ala foi lena i lau Afioga i le sui usufono mamalu, e talitonu lava, ia faalatalata ifo i le tatou mataupu ma le tulaga o i ai le tatou Lipoti.

Afioga FEPULEAI FAASAVALU FAIMATA SUA: Faafetai.

FOFOGA FETALAI: Toe lua minute o le sui usufono.

Afioga FEPULEAI FAASAVALU FAIMATA SUA: E te iloa foi so o se tala lava e faamatalaga e tataua ona quote mai se mea e faamaonia ai pe faamalosi ai le mau. Ia afai ua afaina i lea vaega, ia leai, e le o le agaga lena o le taumafai e fau se tala e aumai totonu o le Lipoti. Ae faafetai i lau Afioga i le Fofoga Fetalai.

Ia, o le isi vaega ou te agai atu i ai o le suiga o le Faavae ma le suiga o le Tulafono o le Faamasinoga o Fanua ma Suafa. E i ai foi le isi fasiupu lea na

tusi ai le Loia Sili e aveese. Fai mai le upu lea, seia vagana le faatagaga a le Peresetene. Ae a ou faitau atu i le Faavae o le Tulafono o Faamasinoga Fanua ma Suafa ma le vaega tonu lea e agai i ai le fuaiupu lea, o le tali po o le tetee i luga o Faamasinoga Apili. I lou la matai tausinu ma fai faamasinoga, e le talafeagai le faatagaga a le Peresetene. A toe faataga le tusi lea, o ia e saofai e fai le faaiuga lea? O lona uiga e pule ia pe taga pe le taga, a vaai atu lava aua o ia lea e saofai i le nofoa lea e fai le faaiuga lea. Ia, o masalosologa uma lava o tatou. E leai lava se isi e leai se masalo. E le tatau la ona tuu upu ia i totonu, aveese, seia vagana le pule po o le faatagaga a le Peresetene, leaga o le Peresetene lea e faia le faaiuga i luga, ae toe pule ia pe talia pe le talia. E le talafeagai, e feainai ai faaiuga ma fuaiupu, e le fealofani ai.

Lau Afioga i le Fofoga Fetalai, i le Vaega 104(a) e tau i le (g) o le Faavae, lea la e i ai le Vaega lea e 104E e fesui. Pau lava lea o le Fuaiupu po o le Vaega o le Faavae ua mafua uma ai nei vevesi i lou lea talitonuga, aua o i tonu lava lea ua fai ai fogafale e 1, 2, 3. E 3 fogafale ia ua fai i le Fuaiupu faaopopo lea. O i foi na ala ai ona i ai le suiga tele lava lea i le tatou atunuu. O le a le suiga? Fai faatopetope. Ia o le matou itumalo i Savaii, na ou alu lelei fai le matou foi nai talatalanoaga laiti ma matai o le matou nuu.

Afioga Fuaava Suluimalo Amataga (Aleipata Itupa i Luga): Lau Afioga i le Fofoga Fetalai o se mea e fia faasao faamolemole.

FOFOGA FETALAI: O lea o le a tau faauma mai le saunoaga a le sui usufono mamalu.

Afioga FEPULEAI FAASAVALU FAIMATA SUA: Peitai e fai atu, na ioe, e malamalama lelei i le faamalamalama o le mea lea. Ae omai le matou itumalo...

FOFOGA FETALAI: Onosai mai lava le sui usufono... Se i tuu atu tasi lava po o le a se mea o fia saunoa mai ai le sui usufono mo Aleipata Itupa i Luga.

Afioga Fuaava Suluimalo Amataga: Faafetai i lau Afioga i le Fofoga Fetalai, ua faafofoga foi le Maota i le saunoaga matagofie a le sui usufono mamalu. Ae ona o lea e talanoa mai i le Faavae, ia o lea e tau mai le Vaega 104 lea e tau ai le fogafale 1, 2, 3. Ae silasila foi, o le 104 i le Faavae, o mea ia tau i le siosiomaga ma le tulaga foi lele o...lea e i ai le faaupuga, faamasinoga o matafaga ma eleele lofia i le tai sua, e le o manino la ia te au po o fea le vaega o le Faavae lea e agai i ai le finagalo ma le saunoaga a le sui usufono faamolemole. E na o le lua foi vaega o le 104. Faafetai lava.

FOFOGA FETALAI: Ua faafetai, ona ua taua foi mo faamaumauga a le Palemene, o lea foi e faamanino mai e pei na ona tilotilo i le itu lea o le Faavae, po o le sao lea o le saunoaga a lau Afioga i le sui usufono mamalu.

Afioga FEPULEAI FAASAVALU FAIMATA SUA: Faafetai lava mo le avanoa. O lea ou te talanoa atu i le suiga o le Tulafono, ona e mataulia foi o le Tulafono tuai lea sa i ai, lea sa 103 o le vaega tonu lea o matafaga. Ae sau loa le isi teuteuga o le a suia le 103 i le 104, ona me'i lea i luga o le isi, ae me'i mai i lalo le isi. O le 104 lea ua i ai le mea faaopoopo, a o lea ua me'i i luga i le 103 le vaega lea. Ia malie lau Afioga i le sui usufono, se i silasila ane pe a fai e i ai sau tusi faapea...lea, suiga fou lea ua eseese ai. O le 103 lea sa i ai i le mea mulimuli, silasila i ai faamolemole...

FOFOGA FETALAI: O lea ua maua lou finagalo.

Afioga Fuaava Suluimalo Amataga: Ona o le tusi lea o lea e aumai e le Ofisa o le Fono mo sui usufono uma, lea la ou te faitau ai i le Faavae lea lanumoana. Ae afai ua i ai sa tou kopi fou laititi lenei, ou te le iloa la po o le a le mea ua faaese ai a outou kopi, ae o lea matou te nonofo ma kopi ia o le Faavae faamolemole.

Afioga FEPULEAI FAASAVALU FAIMATA SUA: O le teuteuga foi lea ou te talanoa atu ai, o le mea lea e tau tuu i totonu. A fai o le mea tuai lenei, o le mea lea o lea e tau tuu i totonu lea ou te talanoa atu ai, lea e tau lote mai e le Lipoti. A silasila i ai i le Lipoti, 104(e), ua e tau silafia?

FOFOGA FETALAI: E leaga o lea sa tau fesoasoani mai le Failautusi, e pei o le tulaga lenei e pei o la e saunoa mai le sui usufono, o lea ua tuu i luga le Faamasinoga o Fanua ma Suafa i le 104, o le sao lea? E pei o nai suiga na mo le silafia e lau Afioga i le sui usufono mo Aleipata Itupa i Luga. Ae faaii maia lau saunoaga ua uma lou taimi.

Tofa Hon Olo Fiti Afoa Vaai: Lau Afioga i le Fofoga Fetalai, e avatu lava le faafetai tele i le sui usufono o Salega 1, o le mea lea e iloa ai le sui usufono mataala, ua mamao i luma ana sailiiliga o tatou Tulafono e le i tuua i totonu. E faamalo i lau Afioga i le sui usufono mamalu, matuai e atamai tele.

FOFOGA FETALAI: Ia faaauau maia le saunoaga o lea foi ua maea lou taimi, faamaea maia lau saunoaga.

Afioga FEPULEAI FAASAVALU FAIMATA SUA: Ia faafetai mo le avanoa, e leai o le ala lea o le faaali atu o se lagona o lenei usugafono o

Salega 1, faafetai Salega 2, o taua lava o uso, leaga o le tama o le tulafono. O le Tulafono lea ua mafua ai ona vevesi le atunuu, talu ai le fesuiaiga lea, ua tele ai mea ua tasui. I lou faitau atu ma lau matau i lau lea sutesuega, pe 68 ea fuaiupu o le suiga o le Tulafono o Faamasinoga o Fanua ma Suafa. E 7 vaega o le teuteuga o le Tulafono, e 68 fuaiupu o le Faamasinoga o Fanua ma Suafa. A o aafia ia e aafia ai e tusa ma le Lipoti, e 4 vaega ia e aafia, e 15 fuaiupu lea na fai mai luga o le imeli. I le faavae, o le mataupu 104(a), mataupu 104(e), mataupu e 104(f). O vaega ia e pei ona fai atu, o mataupu atoa lava lea o lea ua tatou vevesi ai.

Ia ina ne i umi naua, e faamalulu atu i lau Afioga i le Fofoga Fetalai, e naunau lava e avatu se lagona ona ua tupu le tatou vevesi ma faapea le atunuu ma tele foi tala a le atunuu. Ou te alofa atu foi i le la itu, le Afioga ia Tuilaepa sa tulai mai le foe, e tele foi lona sao ma ona aoga, ia outou afioga foi sa tu mai le foe, Minisita i na vaiata, malo, malo galulue. O le upu moni lava e le mafai ona outou silafia outou sese ma outou sisi, o lea sa outou nonofo i totonu o le faletele. Ae matou matau mai tua, lea e tau fau ai so matou lagona. O lea foi la ua avatu ai se lagona faafetai, faafetai tapena...

Afioga Peseta Vaifou Tevagaena: Lau Afioga i le Fofoga Fetalai, o le mea e fia faasao.

FOFOGA FETALAI: O lea o le a faauma mai le saunoaga.

Afioga FEPULEAI FAASAVALU FAIMATA SUA: O lea foi la ua faasolosolo atu, i le tulaga lea, ona i ai lea o le agaga e faapea...

Afioga Peseta Vaifou Tevagaena: Lau Afioga, ona o lea e...

FOFOGA FETALAI: Ia onosai mai lava le sui usufono mo Salega 1 se i... tulai mai, e i ai se mea e faa...

Afioga Peseta Vaifou Tevagaena: O le saunoaga lea e saunoa tuulafoai le sui usufono, o lea e te fou mai i le Maota, a lea e afio mai le Palemia, afio mai Laauli, afio mai Olo, o Wayne sa i i, o ai le e te faitio i ai? E te faitio i o i le la itu? Aua e te toe faitio oe i la outou itu. Se fuafua lelei le lauga.

FOFOGA FETALAI: Ia malie ia le sui usufono mamalu, faauma maia le saunoaga.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, o le mea e fia faasao faamolemole. O lea ua manaia lava le agiagi mai o le sui usufono lela, e faalogologo atu lava ma le totoa, ua toe tolaulau mai lava mea ia e aumai i le Lipoti. A o le fesili, o le a la se aafia,

a o le a se suiga, o le a se aafiaga ua tulai mai? A o lea ua tu ma toe tolaulau mai uma mea ia o lo o aumai i le Lipoti manino a le Taitaifono.

FOFOGA FETALAI: E faafetai o lea ua manino, ae talitonu lava lau Afioga i le sui usufono o lea ua maua mai le agaga, o lea foi ua faamaea mai le saunoaga. Ia faamaea maia lau saunoaga.

Afioga FEPULEAI FAASAVALU FAIMATA SUA: E pei ua tau maemae le Aiga Satuala, ia mau pea le toovae. O le uiga lava o upu faapea, ou te le talia foi lea upu fai mai e fou. E leai e fou ae tasi le aso, e le i goto le la, a o lea ua atoa le tausaga o ou saofai, ia faamalulu atu ia aveese upu ia o le fou, leaga o la e faafofoga lou itumalo.

Afioga Peseta Vaifou Tevagaena: Lau Afioga, e leaga e tiga upu ia e te saunoa i ai. O lea ua e toe faitio i le Palemia, e toe faitio ia Laauli, e faapefea ona fai. O e malamalama i mea ia e te gagana mai ai i le Maota lenei?

FOFOGA FETALAI: O lea ua maua atu... Se i saunoa mai lau Afioga i le Palemia.

Afioga Hon Fiamē Naomi Mataafa (Palemia): Lau Afioga o le mea e fia faasao, na o lou fia faamanatu atu lava i le sui usufono o Salega 1 o lo o saunoa, o le mea lea na ou alu ese ai o Tulafono ia. O lea la ua ata mai, o nai mavaega tuua foi ia mai le Nofoaiga ma le Tulafono.

FOFOGA FETALAI: O lea ua... saunoa faamaea mai lau saunoaga ua maea lou taimi.

Afioga FEPULEAI FAASAVALU FAIMATA SUA: Ia faafetai i lau Afioga i le Fofoga Fetalai, faafetai foi i le Palemia, le toe faamanatu o lea vaega. Aua e tasi foi lea vaega i le aso na faamavae ai, na ou tagi foi au ia. Aua e pei lava e tu i le fatu, tulou. E faamalulu atu foi i le Palemene i lau faafofogaaga, avea foi le naunau, e pei lava o le taaloga lakapi, a naunau foi e pue ua maualuga le pue. Ou te faafetai ai foi i lenei aso, lau Afioga i le Fofoga Fetalai.

Ona faaiu atu lea i se fofa a Salega, aua e po le a le tele o nei tala lau atu lau mai, o a foi faitioga, aua e pei ona fai atu, a leai se fofa e ui le mai. Ae o lau faitau i le lipoti ma le fautuaga a le Komiti, e toe faasolomuli, e tutusa lava ma le toe tuuese, e tutusa foi ma le tusi o le Tusi Paia o le Faataoto, o lona uso lava faataatia. O lona uiga, o le fofa a Salega, faapafala loa i tua, faataatia lea mea, toe fai se isi mea fou. Ona manatua ai loa lea o le mavaega a tama ia e toalua, Toleafoa ma Fonoti, fai mai sau, ta feainai ia, teuteu le ta va. Ae o le a fai faapea le ta mavaega, si au mea lea e 1, Toleafoa, a o au lea

e 4. O le a tosi le laina i i, a e tago i au mea, e soloa i le aufuefue, ae a ou tago foi i au mea, soloa le aufuefue ia te au. Ou te lagolago ai le faaiuga a le Komiti i e na tagofia le Tulafono lea, soloa le aufuefue, ave i le Tulafono e fai lana faaiuga.

Ia manuia le fono i lau afioga, manuia le tapuaiga a lou itumalo, manuia le Palemene, manuia foi le tapuaiga a Ofisa Sili o Pulega o Matagaluega, soifua ona o Iesu.

FOFOGA FETALAI: Ua malo le sauna, o le avanoa taua ma le avanoa faaauo o lo o tuu atu pea ia outou afioga i sui usufono mamalu, aua foi le faafogafoga mai a outou itumalo mo lo outou sao.

Na o se fautuaga a le Nofoa, ua manaia le lauga a le sui usufono, ae ou te fautua atu foi, o lea ua uma a tatou lauga faataupou, a o le aano moni lava, e na o le tai 15 minute ia e avatu, e alolofa i le tatou taimi. E alolofa foi i lo outou naunau mai i outou manatu, ae manatu lava i le tatou taimi. Ua maea a tatou lauga faataupou sa tatou oo i o tatou itumalo, a o le avanoa lenei o le tatou Lipoti, o lea foi e tautulituli atu le tatou galuega, o se fautuaga lena.

O le tulaga i le... leaga e le i maua atu e le Nofoa le saunoaga lea a Peseta i le fou, ae e ao foi ona avatu se fautuaga a le Nofoa. O upu ia e le tataua ona toe taua i totonu o le Maota lenei, o ai lava ua i totonu o le Maota lenei, o sui usufono mamalu o le atunuu. O le mafuaaga foi lea e oo lava i le faaiuga o le Nofoaiga ma faataape le Palemene, ae toe o i tua e toe filifili mai, o tatou uma lava, ua tatou omai i le filifiliga a le atunuu. O le taua lena, e manatu tele i le mamalu o le Palemene ma sui filifilia o le Maota. E i ai le agaga faapena, e le mafai foi ona nofo le Nofoa, leaga e le i maua atu le tulaga lea. Aua foi ne i taumamaina ia sui usufono mamalu o le tatou Palemene, ia tatou manatu o sui usufono ua filifilia mai e o tatou itumalo, o le agaga lena ia o tatou tausi le vafealoaloai. O lo o i totonu foi o tatou Tulafono Tumau, le faaaloalo o le tasi sui usufono i le isi sui usufono e faavae mea i lagona ia, ona o sui usufono mamalu a le atunuu. O le mea lea o se fautuaga lena a le Nofoa mo le agai i luma o le tatou galuega.

O lea ua matau atu, o lea ua tulai mai le sui usufono mo Vaimauga 1. Lou avanoa lenei.

Afioga SULAMANAIA FETAIAI TAUILIILI TUIVASA (Vaimauga 1): Lau Afioga i le Fofoga Fetalai, e fia fai foi se sao o lenei itumalo. E muamua ona ofo alofa atu ma faamanuia atu i le aso fanau o si o tatou atunuu le 60 tausaga, i lena Itu o le Maota i le afio o lau Afioga i le Tamaitai Palemia, lau Afioga i le sui Palemia, afifio foi Afioga i Alii ma Tamaitai Minisita o le Kapeneta, faapea foi afioga i Minisita Lagolago. E faamalo i le galulue ma le faatautaiga o le sa o le atunuu. Ua tatou i ai i lenei vaitau i le faamai oti ma tulaga ua aafia ai le lalolagi, a o lea lava e mau le toovae i totonu o si o tatou atunuu. E faamalo i le faatautaiga o le sa o Samoa.

E faatalofa foi ma ofo alofa atu lenei itumalo i lau Afioga i le Fofoga Fetalai aua le faatautaiga o le Fonousu a le atunuu. Malo le onosai malo le lavapapale. E faapena foi ona faatalofa atu i le Afioga i le Sui Fofoga Fetalai, o lea ua maua i lenei taeao ma lenei foi Fonotaga, ua toe faafoisia le malosi o le tino, ia agalelei le Atua.

E faatalofa foi lenei itumalo i le afio o lau Afioga i le Sui Taitai aemaise sui usufono mamalu o lenei Itu ma le Palemene o Samoa. O tatou o le Malo, o lo o tapuaia o tatou faiva alofilima e si o tatou atunuu.

Ae le i faia se sao lau Afioga i le Fofoga Fetalai, e muai faatalofa i le afio o le Afioga i Le Ao mamalu o le Malo ma le masiofo, faapea le afio o le Afioga i le Sui o le Fono o Sui Tofia ma le masiofo. O le afioga i le Faamasino Sili ma le faletua, aemaise le Peresetene o le Faamasinoga o Fanua ma Suafa ma le faletua. Ia afifio foi Alii ma Tamaitai faamasino o Faamasinoga e lua. Ia aemasie foi o le taputapu a le aufaigaluega paia a le Atua o lo o nonomanu i le Atua aua se manuia o Samoa, lea e oo mai lava i le taeao lenei, o lo o vaai lava sulu o le tino i lenei Maota, o lo o atoatoa pea le mamalu o lenei Maota e ala i le soifua laulelei, ia viia le Atua.

Le tapuaiga a Samoa, tapuai maia se i fai so tatou sao aemaise o si ou itumalo o Vaimauga 1, tapuai mai, faapena foi nai tina ma tama matutua, e le gata o Samoa nei a o atunuu mamao, tapuai maia se i fai so tatou sao i lenei mataupu.

A lagalaga le Maota i lenei taeao ma le amataina mai ua alagatatau. E taua loa o tatou faasinomaga e ala i fanua ma eleele ma suafa, e leai lava se isi e fia nofonofu. Ou te momoli ai le agaga faafetai i le Afioga i le Taitaifono, sui Taitaifono ma sui usufono mamalu sa ioeina ma tofia e le Maota lenei latou te iloiloina ma lipoti mai i le Palemene lenei le mataupu, e momoli ai le agaga faafetai. O le taimi e tofia ai ta ita i se Komiti ta te meemea ua amanaia ta ita, e fai so ta sao. E i ai le taimi tatou te tuua ai le Nofoa lenei, ae afifio mai alii ma tamalii o o tatou itumalo vaai i se mea na e faia i lou taimi na e i ai i le Palemene o Samoa, e momoli le agaga faafetai. A o le matau i le aotelega o lenei Tulafono, ina ua ou oo mai foi i totonu ma matamata ai, i le matautia o mea na fai e o tatou tuua, lea na faamanatuina ananafi le 60 tausaga. O le mea matautia o lenei Fono Faavae sa i ai, o lou fiafiaga o au ia, ou te sau o i ai i totonu ia suafa o ou tama, o Faosau mai Vailele ma Ulumalautea o nai ou tama ia. O si o matou nuu foi o Letogo le Afioga ia Tuliaupupu, o Laulii ia Leniu. O lou fiafiaga lea, ua ou oo mai i totonu ma ou matamata ai i le Fono Faavae, sa i ai i le faufauina o lenei Tulafono, o le Tulafono lea o Fanua ma Suafa, aemaise o le Fono Faavae. O lau la matau e le faigofie, a siisii le Maota lenei, e pei ona ou taua e le faigofie. A o le taeao lenei ma le matau a lou nei sui usufono, i le aotelega lea ou te talanoa ai, e lagona ai le faanoanoa i le manatu faaii a le Komiti, e faasolomuli. O le faasolomuli e 2 lava mea, tulou le Maota lenei, e 2 lava e faasolomuli... o le lagona o le sui usufono lenei lau Afioga i le Fofoga

Fetalai, o le Tulafono lenei na pasia, sa pasia i le 2/3, ona e a? Ona sa aafia ai i totonu le faavae. E le mafai la e se Komiti tulou, pe o se vaega o ni tagata tulou, se toalima toaono, ona suia le malosiaga. E mafua i se a? O le tamaliiaga ma le paiaaga, e na o le Palemene lenei, e faasolomuli, faaleaogaina ia se Tulafono. E le oo i ai se malosi o le Komiti. Ae a le matau a le sui usufono lenei, e matautia. E alu aso sau aso, o lea foi e talanoa le Maota lenei ina ia toe faafoi mai le mamalu. Ae a le mea lea ua fai? Talepe, talepe ia le Tulafono, e na o le Palemene e oo i ai le malosi. O le popolega lena lau Afioga i le Fofoga Fetalai. E matau foi ma le totoa i lenei taeao, ina ua ou tapena mai ou te sau. Sa ou fesili i lou tama, fesoasoani mai po o le a se mea e lauga ai lou atalii. Ae faaali mai e le Atua i lona atalii le Filipi 1:11, fai mai, ia tumau outou i fua o le amiotonu, mai ia Iesu Keriso ina ia viia ai le Atua ma faaneeneina ai o Ia, o le amiotonu lea. O le popolega o le sui usufono lenei o Vaimauga ona e alu aso sau aso, o lona uiga o le a faigofie lava i ni Komiti o le Palemene lenei ona talepe faasolomuli ni tulafono e pasia i totonu o le Maota lenei. O le popolega lena o lenei sui usufono.

FOFOGA FETALAI: Ia fai mai se malologa a le sui usufono se i tuu atu le avanoa i le faauilavea.

Susuga Hon Laauli Leuatea Polataivao Fosi: E leai se agaga e faalavelave i le saunoaga a le sui usufono, e leaga e tasi lea sui o le Komiti, e taua tele lona finagalo faaalia i le taeao lenei. A i ai se isi sui usufono e faataua i lou manatu lana saunoaga i le taeao lenei, o le sui usufono lea mo Vaimauga 1. E na ona ou fia faamalamalama lava o le saunoaga lea ua opea i le Maota, e faapea o le faaiuga a le Komiti e talepe le Tulafono, o le mea lea o lea ou te tulai atu e faamanino. O le atoaga o le finagalo o le Komiti, o le fautuaga i le Maota fono le Lipoti lea, o le mea lena e tataua ona manino. E le i i ai se faaiuga, ma e le mafai foi e se Komiti ona latou faia se faaiuga i le Tulafono lenei, o le mea lena ina ia manino, nei matau mai Samoa ma ave sese, ua agai le Taitaifono ma le Komiti e talepe le Tulafono. A o le saunoaga lava ia ma le faamalamalama o le Lipoti a le Komiti, ma le mea ua tuuina mai, lea la ua aumai i le Maota. O le fautuaga a le Komiti, ia toe Iloilo ma fai le faaiuga a le Maota. Ia tulou foi le saunoa mai i le 2/3 e sao, le tatou 2/3 na tatou i ai uma i le taeao lea. A le taeao na matua ave i luga ave i lalo, taumafai atu se avanoa e le maua, e na o le toaono tagata na piki e fai le lauga mulimuli. E taumafai atu e aumai pepa e vevela, sa apaapa atu lava e tuu mai se avanoa, se i talanoa. A o le mea lena o lea ou te fia faasao, e le o le tuuina mai o le Lipoti a le Komiti o le faaiuga lena o le mataupu lenei. O le faaiuga e fai e le Fono Aoaofaitulafono, lea la ua aumai, ia faamanino, ina ne i tuuaia le Taitaifono, ua omai le Taitaifono ma lana Komiti, ma talepe le Tulafono. O le fesoasoani atu lena ma le faaaloalo.

FOFOGA FETALAI: Ou te iloa o lea ua manino le faauilavea a le Afioga i le Minisita. Lau Afioga i le sui usufono mamalu, e faamalie atu i le Afioga i le Minisita, e le o lavea le sui usufono i le Komiti lea e i ai nei, a o le Komiti talu ai. E talitonu foi o lea e te saunoa tonu i lagona o lena taimi.

E ao foi ona fesoasoani atu le Nofoa, ona o le suiga lea faapea o le suiga o le faavae, e faamalulu i le sui usufono e leai e le o suia le faavae. O le suiga o le fautuaga lea na avatu e le Komiti i totonu, a o le suiga o le faavae, o lea e moni le saunoaga. O lea ua saunoa manino le Minisita, o lea ua lafo mai i le Palemene, e silasila totoa i ai le Palemene. Ma le agaga faaaloalo.

Afioga SULAMANAIA FETAIAI TAUILILI TUIVASA: O le sui usufono o Vaimauga e le sii soo, ae tumu i le malamalama i le Tulafono Tumau. O le ala foi lea na ou taua, leaga o le fautuaga lea e aumai e le Komiti e faasolomuli. O lea ou talanoa lava au, Laauli po o lau fetalaiga Faatafamanogi, o lea ou te talanoa i le Lipoti lea, o le faasolomuli. E faafetai i le faauilavea, ae o le tulaga i le matau i le aulape po o le taiala na faataatia e le Maota lenei, e mulimulitai i ai le Komiti. Ae o le matau a lou sui usufono, ua ese le taiala sa tuuina atu i ai. O le a le taiala? E o e saili po o le a le..e le toe aafia e outou le Tulafono ua uma ona pasia e le Palemene. A o le taimi e pasia ai le Tulafono e faasau ai i luma, o a kopi sao, e pei o kopi ia e aumai e fa. O kopi na o lea e faatali ai lou itumalo, po o le a tonu le mea e aumai lea na saina ai Le Ao mamalu o le Malo, aepeitai ane ua le o lea, ae ua aumai e faasolomuli, toe aumai e faaleaogaina, dispose...e matautia. E pei o le ala lena lau Afioga i le Fofoga Fetalai ma lena Itu e gatete ai lenei sui usufono. E sao lelei lau afigoa e na o le malosiaga, a o fautuaga ia e aumai.

I le matau foi a lenei itumalo, na amia e le Komiti ia e sa i ai, Loia sili, o le Peresetene o le Faamasinoga o Fanua ma Suafa, o le sa i ai i totonu o le Ofisa o Loia Sili ua le toe i ai, aemaise foi o le afigoa i le Loia Sili o lo o i ai nei. I ni fautuaga i le Komiti, ae peitai ane ua le o lea. Ua le faalogo le Komiti tulou, i fautuaga a i latou ia ae ua fai lava le pule e tasi. Ua fai lava le finagalo o le Komiti i le mea o la e autasi i ai. Ae o le lagona o le sui usufono, sa ou i ai i le Tulafono, oi latou nei aemaise o le sa avea ma Loia sili ma i latou mai le Law Reform, sa fautuaina foi le Komiti ma aumai le tuualalo i mea faatulafono. E pei ona ou fai atu, pe oo mai i le taimi lenei mai le taimi na tutoatasi ai lo tatou atunuu, e oo mai i le taimi lenei, pe ua ova ma le 20 ma ona tupu teuteuga o le faavae. E pei lava ona ou talanoa, e malamalama lelei, e lote loa teuteuga o le faavae, e manaomia le 2/3. O lea la e aafia ai le 2/3 i i, leaga e i ai le vaega lena o le faavae lea sa lote ai. Lau Afioga i le Fofoga Fetalai, o le popolega lena o lou nei sui usufono, e le o amanaia e le Komiti ia fautuaga ia na aumai e o lo o lava le silafia, tamalii o le atunuu ua ave i ai le faatuatuaga o tatou. Ae a? Ua fai lava le finagalo tutasi. E matau foi e lenei sui usufono, ia le le saina o nisi o sui i le lipoti, ia e le fesiligia e lenei

itumalo, o le aiatatau lava lea. E pei ona ou fai atu, e alu aso sau aso, o le a le mea na le saina ai le matou sui, le sui o lenei itumalo. E i ai se mafuaaga?

FOFOGA FETALAI: Ou te fesoasoani atu le sui usufono mamalu. E leaga o lea ua taua le tulaga lea, o lea e popole le Nofoa i te i foi ua tatou fesiligia tele le tulaga lea, ae le i faia se tala a le Nofoa i le tulaga lea. E manatu foi, ia taatia ia, aemaise foi o sui mamalu e le o nofoia mai, o le tulaga lena, e i ai foi le manatu, e fautua atu i le sui usufono mamalu, agai pea i le Lipoti a le Komiti, ae taatia pea le aualii lea, le au le saina, se i i ai se taimi ona fai atu lea o se tala.

Afioga SULAMANAIA FETAIAI TAUILIILI TUIVASA: O le a see ese e faaaloalo tele le itumalo lenei i lau Afioga i le Fofoga Fetalai. O le tulaga lava ia i le tatou nonofo ai ma le tulaga i le Tulafono, e i ai lava le manatu e pei ona taua lava le matau i le Lipoti a le Failautusi o le Fono, o le sasi po o le faatamala foi o le tatou Matagaluega nei, o lou popole ia. Mafua i se? A sasi se Matagaluega, o ai e tuuaina? E tuuaina lava Ofisa Sili o Pulega, e tuuaina lava Minisita o CEO, e oo lava i luga i e e taitaia.

Ae o le popolega lena o lou nei sui usufono, o lea e manino lava le tuualalo foi ma aumai foi le faamaualaloga ma le lipoti a le Ofisa o le Fono, o le lape. E i ai le manatu o lenei sui usufono, o ai e tua i ai le aufaigaluega a le Malo, Ofisa o le Fono? E tua mai iinei ia i tatou ua ave ma taitai. A o le popolega lau Afioga i le Fofoga Fetalai e tagi ai uu le fatu, o lea ua liki i tua tatou lipoti ia, ua ave atu ai ma sui ia ua le mafai ona faailoa mai i le Maota lenei pe tali mai i le Maota lenei. O le popolega lena o le lou nei sui usufono, ona o tatou faamaumauga e pei e... o le uiga o lau tala, o lo o malupuipua. A o le tamaliiaga o nei tagata e le o mafai ona tali mai, e popole tele le sui usufono lenei. Ua saunoa foi isi e ave i le Tulafono, o le faanoanoaga lena o lou sui usufono i le isi fautuaga lena. A o le fautuaga lea na ou taua o le faasolomuli, e teena lea faaupuga. E na o le taavale lava tulou e mafai ona reverse. E lelei la le taavale e reverse atu o la e ola, aua e alu atu i tua toe sau i luma, a o le reverse la lea ae pe, e le iloa po o fea a tulei i ai.

FOFOGA FETALAI: Fai mai sau malologa... saunoa mai lau Afioga i le Minisita o Galuega.

Tofa Hon Olo Fiti Afoa Vaai: E na o si mea lea e fia faasao, i le tulaga ua saunoa i ai le sui usufono mamalu, i le mea e tau o le lape. A lape se mea lau Afioga i le Fofoga Fetalai e 1, pe 2 ona taua lea o le lape. Ae a tatou tilotilo ma silasila i le tele o suiga lea na fai i totonu, e le o se lape le mea lena. E fai totoa lava, e fai malamalama le faiga o le suiga lea. A ova ma le 5, 6, 7 ia suiga ia sa fai, e le o se lape ia te au lea mea, e manino lava ma

malamalama lena itu. Ae mafai lava ona tulei i tua pe tulei i luma pe afai ua i ai se faaletonu o le taavale e pei ona saunoa le sui usufono mamalu.

FOFOGA FETALAI: Mo le faasaoina lava o le taimi. Se i tulai mai le Minisita o Faatoaga.

Susuga Hon Laauli Leuatea Polataivao Fosi: E taua lava le saunoaga a le sui usufono leaga o le sui lea sa i le Komiti, e taua tele lona manatu ma lona lagona. O a tatou faiga faavae a le Palemene, e taunuu loa pepa i le Maota, its public information. E le mafai ona tatou toe taofia, seivagana ai nisi o tulaga e le i talanoaina. A o le tulaga lava ia e taunuu loa i laulau i le Maota, its become public information. O le mea muamua lena. O le mea lona lua, se ou te faataua tele le upu lea o le alofa i le Ofisa o le Fono, ioe, ou te matuai ou gualofa lava i le na avea ma Failautusi o le Fono. E leaga foi o lea o le a taumafai mai e amo uma e i latou le mea lea. Ua tuuai ua sasi le aufaigaluega, a lea faatoa tatou manino nei, o lea faatoa aumai uma lava aulape i le mea na tupu. A o le lipoti lea na aumai e le Ofisa o le Fono, ua taumafai e teuteu lumafale ma aumai, e fifi ia i latou le mea lea na tupu. A o lena e silafia lau Afioga i le Fofoga Fetalai, o lea faatoa manino tagata na omai fai suiga ogaoga ia. O lea e taumafai atu nei po o le a le fofo. O le mea lea o le tetele o tafega ae selefutia i latou, tuuai ia ai ma ai ma ai, a o lea e taumafai e faamanino ma fai se fuafuaga, se i faatulai sao le Tulafono. O le mea foi lea tou te atugalua ai faapea o le faasolomuli, e faasolomuli i se mea e toe fau ia lelei. E le faapea e faasolomuli ma faasolomuli ai lava. O ai o le a le manatu i le Tulafono e vaai ai measina a le atunuu. O le tatou fatu lea o fanua ma suafa, ae le mafai ona tatou o malepelepe ai faapenei. O le fesoasoani atu lena i le sui usufono, a o le Ofisa o le Fono, a i ai ni outou alofa, na mulimulitai le Ofisa o le Fono i fautuaga a e sili atu, o e na avea ma le Loia Sili, o e na avea ma teuteuga o le Law Reform ma i latou e i ai le Peresetene o le Faamasinoga lea e tau faasaosao atu nei. O faatonuga na savavali ai, a o lea o le a fifi ia i latou le mea lea. O le faamanatu atu lena.

FOFOGA FETALAI: Ia tulai mai lau Afioga i le Sui Taitai o le Itu Agai.

Tofa Hon Laufo Fonotoe Nuafesili Pierre Laufo: Leai o lau faauilavea i le sui usufono lea. O le mea e fia faasao i le saunoaga a le sui usufono. O lea ou te matau atu, e sao lelei lava i le isi itu, aua o lea e taoto le lipoti a le Failautusi o le Fono, o la e aumai ia le latou admission, le latou ioega faatamala o le Ofisa. Ua mafua ai ona le atoa Teuteuga ona tuu i totonu o le Tulafono lea na ave i uta e saina ai le Ao mamalu o le Malo.

O la la e manino le mea lena. E le o se tautuuai la pe tau faaleaga le Ofisa a o le lipoti lava ia a le Ofisa la ua aumai la ua o latou talia, o latou e faatamala. Ae e leai foi la ni mea fou na faapea na tau tuu i totonu. Leai ua

le atoa ia mea ia na pasia e le Maota e i ai nai teuteuga, ua le atoa na tuu i totonu o le Tulafono na ave e saini ai le Ao o le Malo.

I lau foi la vaai ma le mea lea e pei ona aumai foi aua o lea foi e i ai ia tusi a le Loia Sili ma le... e leai se mea ua tau ua solitulafonoina ai mea ia na tutupu mai. O lea la e pei ona matau atu, e leai se mea faasolitulafono o i ai. E pau lava le mea ua faatamala ua le tuua i totonu, i totonu o le tasi le masina lea e fai mai ai ia le Tulafono Tumau 113.

Ae o lea e faatu atu ai le manatu, e pei ona avatu, e mafai ona faataatiaese ae Tulafono Tumau, pasia toe ave i totonu ae toe faaauau la tatou fonu.

FOFOGA FETALAI: Ia o lea ua maua atu, ia lea ua faafofoga mai ia sui usufono mamalu. Ia faaauau mai ia lau saunoaga.

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai e... o le agaga lea sa tau avatu i le popolega i le lipoti lea ua saunoa foi le Minisita o Faatoaga ona o lea ua fofola manino e le Taitaifono i i le lipoti lea faatalatalanoaga lea na faatino ai i o i le tatou Ofisa. O le popolega lena i faatalatalanoaga e aumai ai ia le mamalu o le atunuu ma agai atu i o, o lo o pueina ma teuteuina i le malupuipua o le tatou Ofisa.

Ae sao lelei oe a aumai i i ua aumai loa ua faalauiloa. Ae o le agaga lea ua avatu ai e lenei itumalo, o lea ua aumai manino lava e le afioga i le Taitaifono o le Komiti lea, o latou lava faatalatalanoaga i o i le taimi na o atu ai, o ai, o le a lona finagalo na saunoa ai? E malupuipua i totonu o le tatou Ofisa, o le ala lena lau afioga o lea foi e te silafia aua sa e saofai i le Fofoga Fetalai. O le ala lena ona e le mafai ona tali mai i latou nei.

E teena ai e lenei itumalo ia le vaega o le Lipoti e fai mai e ave ia latou nei. E faafefea ona ave e le o mafai ona tali mai? E le ave foi le malupuipua o tatou saunoaga lea e saunoa ai i totonu o le Maota lenei ma mea e tatou te tafili saunoa ai i tamaliiaga foi ma tupu foi o le atunuu ia. O lea e tatou te e pei foi ona ou fai atu e pei ona aumai i lau ia matau atu i lenei taeao, ia tutumu outou i le amiotonu mai i le Atua, o lou lea agaga.

O lea ua uma atu foi le isi lipoti a le Komiti, Komiti lava nei Faapitoa o le Fonu. O lea foi ua fai i ai le finagalo, ae o lea foi ua toe aumai lenei... O le uiga o lau tala lau afioga i le Fofoga Fetalai, e pei o lea ua tuu le mea na o e fai, a lea ua taumafai e tulituliaupu lava po o ai la e i tua? O le ala lea. Ia o lea ua tuuaina mai nisi ua omai i fea, ua aumai imeli. Ae a tatou oo lava i ooooga e suesue le amiotonu, tali foi latou i faamaumauga e aumai...

FOFOGA FETALAI: Ua maea le taimi o le sui usufono, ua maea le taimi o le sui usufono.

Tofa Hon Olo Fiti Afoa Vaai: Lau afioga i le Fofoga Fetalai, o le mea e fia faasao...

Afioga SULAMANAIA FETAIAI TAUILIILI TUIVASA: O fea e tu ai le Maota lenei? O fea e aumai ai tupe pe a su foi e pei o ia tulaga faapena? Popole tele le itumalo lenei.

FOFOGA FETALAI: Ia se i tulai mai le Minisita...

Tofa Hon Olo Fiti Afoa Vaai: Lau afioga i le Fofoga Fetalai, o atugalu le finagalo o le sui usufono i le le auai o nisi o lo o tuuaia i le mataupu lea e tali i totonu o le Palemene. A lena ua manino le lipoti a le Komiti, e tuuina atu le mataupu i fautuaga lea e aumai e tuuina atu le mataupu i le Ofisa o Leoleo ma le Faamasinoga. O i ina e maua ai le taimi e tali ai e o lo o i ai le tulaga lea.

Ia ma le faaaloalo.

FOFOGA FETALAI: Ia ou te iloa ua manino lea tulaga lau afioga i le sui usufono mamalu. I o itu uma foi lava. O le mea sili foi lea ua taatia mai ia lou finagalo. Ia o lo o i ai foi ia le silasila totoa a le paia o le Palemene ia ma le tulaga o i ai.

Ia ae faamaea maia le saunoaga ua maea lou taimi.

Afioga SULAMANAIA FETAIAI TAUILIILI TUIVASA: E ava tele lenei itumalo i le Nofoa aemaise lena itu. Ia ae e pei lava o lau ia matau lena. Faamalulu atu ai pe a paopapa. E pei ona ou fai atu o lea na faataatia lava e le Maota lenei ia taiala e agai i ai le Komiti ae peitai ane o lea ua le tali mai o le a le kopi e faaoga o le a le kopi lea na saina ai le Ao o le Malo? A ua aumai, ua advance tele, ae advance i mea sese, advance i tua atu i mea e le i faatonuina atu i le Maota lenei, ona o le a? Tuli lava le mea lea po o ai la e i tua. Tuli lava, o le agaga lea lau afioga ua uma atu.

FOFOGA FETALAI: Ia e manatu... ia faafetai, ia faafetai.

Afioga SULAMANAIA FETAIAI TAUILIILI TUIVASA: Ia ua uma atu so matou sao. Faamalulu atu, e pei ona ou fai atu o le lauga a le Vaimauga, lauga sao lava i le mataupu lea ua i ai le taeao lenei. O le a foi sa outou faafofoga, le Maota lenei ma Samoa i le lauga, popolega lena o lenei itumalo i le tamaliiaga lea e i le Palemene lenei.

E leai lava ma se isi malosiaga o le faasolomuli, o le faaleaoga o le.... e na o le Palemene e ona lana matafaioi. O le popolega lena mo le agai i luma. Ia faamanuia le Atua i lau afioga i le Fofoga Fetalai, faapena foi i lena itu i le afio o lau afioga i le Tamaitai Palemia ma le Kapeneta.

Ae o le tali i le alii lea o le Minisita lea o Felauaiga aemaise o ia o lo o i ai mo mea ia o lea sa fesili mai i le faasolomuli, mataulia o oe lea e te pulea taavaleafi, e i ai la le taavale e faasolomuli atu i tua, e mafai ona toe aua e

mafai ona faatei foi na pe afai o la e suikia. Ae a faasolomuli atu la le taavale okometi, e alu atu lava ma faapulou ai loa ua leai se... O le popolega na o le Vaimauga, i faasolomuli, faasolomuli e le toe ola mai ia le taavale lea ua pe.

Ia manuia le Fono i lau afioga i le Fofoga Fetalai, aemaise le la itu o le Maota.

Tofa Hon Olo Fiti Afoa Vaai: Lau afioga i le Fofoga Fetalai o le mea e fia faasao.

FOFOGA FETALAI: Ia...

Tofa Hon Olo Fiti Afoa Vaai: Ou te le pulea taavaleafi a le atunuu a o le mea tau o le laiseneina taavale a le atunuu e oo i ai lou malosiaga. Ia ma e faamalulu atu o au nei ou te le iloa avetaavale okometi. Ia e na o lau afioga o lena e te silafia.

Ia ma le faaaloalo.

FOFOGA FETALAI: Ia faafetai, faamalo saunoa i le sui usufono mamalu mai Vaimauga 1. Ou te talitonu foi ua lagona foi e le Maota lou finagalo faaalua. E taua foi i nisi itu e pei ona saunoa mai lau afioga.

Ia se i tulai mai lau afioga i le Tamaitai Palemia.

Afioga Hon Fiamē Naomi Mataafa: Lau afioga i le Fofoga Fetalai sa le fia faauilavea a o folau le sa i le sui usufono mamalu. Ae e i ai lava le itu lea ua ou tulai atu e i ai i sou popolega i le saunoaga lea e pei e foliga mai o le Komiti, e le o se tino o le Palemene lenei. O le Komiti lea, o le Komiti na filifilia e le Palemene. Ma e foi lea i lau faalogologo atu, te i ua ou sese.

Lau afioga i le sui usufono mamalu, e pei e foliga mai e i ai sou finagalo e ese le Palemene ese le Komiti lea. E le fou foi le aumai o lipoti a Komiti e eseese finagalo o le Maota e faaalua. Ae o se agaga e faatupu, e le o se tino o le Palemene a tatou Komiti.

Lau afioga i le Fofoga Fetalai, i lou tulaga faataitai o le Maota, ou te le talia gofie lea ituaiga mau. Pe le talia le lipoti, o le finagalo lena o le sui usufono, ae o ni saunoaga e tavavae ia se itutino taua o le Maota, e pei o tatou Komiti, leai. Pe lelei lipoti pe leaga lipoti, o Komiti a le Palemene.

O lea foi na i ai isi lipoti na aumai i totonu o le Maota lenei, sa ou tetee foi au i ai aemaise le lipoti i le filifiliga ma le faiga o le faaiuga o le Peresetene o Faamasinoga o Fanua ma Suafa, ese lou taofi. Ae o le a le mea na fai? Fai le finagalo ma le fautuaga a le Komiti na faataatia, lau afioga.

FOFOGA FETALAI: Ia, ou te iloa o lea ua manino. Faafetai foi i lau afioga i le Tamaitai Palemia i le tulaga lea. Ia e ao foi i sui usufono mamalu ona o tatou lagonaina le taua ona o so o se Komiti filifilia lava a le Palemene,

o le mamalu lava lena o le tatou Palemene. E talitonu foi o tou afioga e tele lava ina outou saofafai foi i tatou Komiti, o le mamalu lava o le Palemene o la ua tuu atu i le Komiti, ia e faapena ona tauave ai ia o latou tiute.

O le mea lea ia aua ne i tuumamaina i a outou saunoaga ia galuega a Komiti. E aumai lava fautuaga, ia a o tatou Komiti, ia o le agaga na e pei ona saunoa ia le Tamaitai Palemia, aua ne i tuumamaina galuega a tatou Komiti. O Komiti filifilia a le Palemene, e taua foi ia latou tiute ma faiva ma galuega. O le mea lea e taua foi ia le fautuaga a le Palemia ua tuuina mai mo le mamalu o le Palemene.

Afioga SULAMANAIA FETAIAI TAUILILI TUIVASA: Lau afioga i le Fofoga Fetalai pe... leaga lea ua tali mai le Palemia i le lauga a lenei itumalo ua faauma.

Pei e faamalulu atu e malamalama lelei le sui usufono lenei ae o le tulaga lea sa ou lauga i ai e malamalama lelei o le Komiti lava o le Komiti a le Palemene. Ae e faauma atu ai le lauga a lenei itumalo, teena le lipoti a le Komiti. Teena e le gata e soli faavae, soli tulafono, soli tulafono tumau, ma lou faaaloalo lava i lau afioga i le Fofoga Fetalai.

FOFOGA FETALAI: Ia malo faafetai, ia o lea ua faamau lelei ia le teena a le sui usufono mamalu. E le afaina o lea ua faaali lou finagalo e taua tele ia malo lava saunoa. Ia faafetai foi tofa.

Ia malie mai le sui o lea itu se i tuu atu, ia fai ma felafoai. Ia o le a tuu atu i o ia Palauli o la ua leva ona tulai mai analeila. Ia Palauli, ia saunoa lou avanoa lenei.

Tofa LAGAAIA TIATUAU TUFUGA (Palauli 3): Faafetai i lau afioga i le Fofoga Fetalai, manatu foi e le toe tau paopaoina faatupemua paia o le Maota lenei o Samoa, le paia o le Palemene. Ia o lea ua maea ona papae tia i Ulupaga. Ae talitonu le faamoemoe, a faalepa le laulai o le afiafi e fesilafai ma le tutafaitoa, ina ua togo ae le fetuao o le malamalama o le aso fou e i ai le aso. O le alofa faasoa lea ma le alofa faaali o le Atua ma Lona matagofie.

Ae a folau le Siuamoa po o le Mataupolu, e folau i le taulaumea e tatou te le iloa faafatiatamai. O lagona foi ia, e i ai le popolega ma le manumanu i le Maota lenei. O le aso ma le taeao, o le taeao o le toefuatai ma le tauatai ae faatuanai le lape ua alu. Manai le mataupu i le aso.

Faafetai i lau afioga i le Fofoga Fetalai, faafetai i le tuualalo ma le fautuaga e momoli mai. E uma lava ia tatou mea ua maotua tele ia tatou lauga toe tae mai ia le mea ua alu. Leai aua le toe aloa le ogasami ua uma. E le maua ai se filemu ma se fealofagiga o le Palemene. O le aso e pei ona talanoa o luma atu. Aumai finagalo ma o tatou manatu, e lagolagoina le Tulafono lea, mo nei, taeao ma ielua. Ae o le tatou toe aapa i tua, ia o le mea lea e maua e tatou te fetuatuanai ai. E le maua ai se fealofani ma se filemu o le Palemene.

Ae faafetai tele i le Komiti ma lau afioga i le Taitaifono, malo le tofa, malo saili. I le agaga moni lava ia, leai, aveese le upu lea e toe faasolomuli e sao ai le sui usufono lea o Vaimauga e aveese lea upu lea o le toe faasolomuli. O totonu lava o le Maota leni ma le Palemene o Samoa, e tatou te fili ia le tofa ma le utaga oo.

A finagalo le Maota e aveese le Tulafono lea, aveese. A finagalo foi e faaauau, o lena lava. Ae ala la ona tele a tatou upu e le o fetai foi ia le tatou gagana faasoa ma le faaali mai o outou finagalo. Ae i le taofi lava ia, toe faafoi Samoa i lona Faavae ma le mea sa fau ai i tuua ma matua ua mavae. O le manaia ia o le mamalu i lena taimi. Sa leai foi se vevesi. Aisea? O le fetufaai ma le felagolagomai.

Aumai le pule, leaga o Samoa, e leai ni pulega faamatai i atunuu i fafo, leai. E na o Samoa lava ua vaelua i ai le suafa o le Atua i matai e pulea le atunuu, pulea aiga. Ioe, e pei lava ona ou talanoa atu o tatou na tofia e lo tatou atunuu e tatou te omai e taitai le faigamalo a Samoa. Ae taitai i le amiotonu ma le faamaoni fai meatonu. O ia mea uma o le sini o le alofa i le atunuu ma le fuaga o lalovaoa.

Ou te talanoa i le Tulafono, o le matuai ou lagolagoina le Tulafono o faafofoga tapuai Samoa. Toe faafoi, toe faafoi Samoa i lona Faavae mai i le amataga.

A silasila foi i titi na fafau e le autulatoa ma le aufueloloa o le atunuu, e ese le manaia. Na ona gase lava o taua tu le Malo o le Atua, fai mai toeaiina, Faavae i le Atua Samoa. Pulega lelei lena, a tatou mulimuli ai lea, e omai foi ia alo ma fanau i le atunuu e mulimuli ai lava. Ae a fai nei ia ni tatou fefaafinauaiga, ia paga lea, ae ou te tautino i le mea lea i le Tulafono, tautuana measina a lo tatou atunuu. Tautuana measina a lo tatou atunuu. O mea tau faamasinoga ma eleele, o eleele e pule faasao.

Ia aua o le mea la lea na tupu nei i le mea lea o le aumai o le aiatatau, o lea ua o tatou faafofoga i ai. Vatau lea aiga, vatau lea aiga. Ua tiga lava le taulelea tama ma le teine, ua faaaliali mai ia le aiatatau ua sopoutu. Ua fia lialia, fia faailoa lona pule ma lona atamai. E le manaomia e le aganuu a Samoa ia mea. Pe vaivai le matai sao o le aiga, ave i ai le faaaloalo ma le faamua seivagana ua sosopo ua pule ma le le amiotonu ma le faasausili i le aiga ona maua lea o le avanoa, soalaupule pe tulafono ave manino i ai mea ia, ona ave lea o se aoaiga i le sao lea pe afai ua pule faasausili.

O le mea lea ou te tautino ma le faaaloalo i le Maota o Samoa, ou te matua lagolagoina le Tulafono. Tatou toe foi i tua ae e le o le faasolomuli. Tatou toe foi i tua e toe aumai le aganuu mamalu lea a Samoa. E pau lea, e tautala sao lava Palauli ia i le Tulafono ina ia lagolagoina le Tulafono.

E faamalulu atu i le faafofoga a lena itu o le Maota, lava na mea aua tatou te tusitusilima. Omai tatou galulue faatasi, lagolago ia le tatou Tulafono ua tatau foi ona uma ia le tatou Fono ae ua tuai ona o le felafuai fua ma ua toe

sopo i tua faamatalaga, ae o le mea e manaomia, lagolago ia le tatou Tulafono.

Agalelei mai le Atua, fesoasoani mai, faatonu folau ma faatonu ma aumai manatu lelei, e fau ai le sa o Samoa. Ioe, e pei o le mea lea e agaga i ai, e auma le atoa o pufagota? A le seia le lafialalo e folau fua lo tatou sa e mama lava. Ao lo tatou tutufaatasi ma le felagolagomai, ua manuia le faiva o Samoa.

Manuia le faafofogaaga a Samoa. Faafetai i lau afioga i le fofoga o le Fono lau afioga i le Fofoga Fetalai. Malo le onosai malo foi le lototele. Ia faafetai i le afioga i le Palemia ma le tatou Palemene. Alofagia foi e le Atua le tofa i le Taitaifono, alu i ai, aua e te finau vaivai, finau i le mea sao.

Manuia le Fono.

FOFOGA FETALAI: Malo faafetai, ia faafetai mo le saunoaga a le... ia se i tulai mai lau afioga i le Minisita o Pisinisi, Alamanuia ma Leipa.

Tofa Hon Leatinuu Wayne Soialo (Minisita mo Pisinisi, Alamanuia ma Leipa): Lau afioga i le Fofoga Fetalai, e pei uma lava o lea e tau... o le sao o le lauga se i toe fesili atu pea, o le lagolago i le Lipoti ae le o lagolagoina le Tulafono, leaga e leai se Tulafono o tatou talanoaina i leni taimi.

Ia ae lelei lava ia le toe faamalamalama i le afioga ia Palauli i lona finagalo ina ia faasao ai ia tatou faamaumauga.

FOFOGA FETALAI: Ia faafetai, faafetai fesoasoani mai. E pei o le agaga o le Minisita lau afioga i le sui usufono mamalu o Palauli o le Tulafono pe o le Lipoti lea e te lagolagoina?

Tofa LAGAAIA TIATUAU TUFUGA: Faafetai, faafetai foi i lau Minisita le toe faamanatu mai. Ia e faapena lava e i ai lava le taimi foi lea e galo ai ao le Lipoti, o le mea lea e igoa o le sasi a? O le Lipoti e matuai ou lagolagoina.

Ioe, faamalulu atu i lau afioga i le Fofoga Fetalai, faapea foi le faafogafoga a le Palemene, o le Lipoti. Faafetai Minisita.

FOFOGA FETALAI: Malo, faafetai o lea ua maua lau afioga i le Minisita ia le faasaoga o le saunoaga a le sui usufono mamalu mai i Palauli pe o le Minisita Lagolago o Pisinisi ma Alamanuia.

Ia malo saunoa Palauli, faafetai o lea ua maua lou finagalo. E taua foi le fautuaga e pei ona tuuina mai aua lava le agai i luma o a tatou talanoaga a le Palemene. Faafetai foi le faasoa faatoeaina. Ia malo lava Palauli, faafetai tele mo le faasoa.

Ia o le taimi leni mo lau afioga i le sui usufono mamalu mai i Safata 1.

Afioga LEAANA RONNIE POSINI (Safata 1): Lau afioga i le Fofoga Fetalai, faafetai tele ua maua se avanoa o lenei itumalo e faaali ai so matou manatu i le Lipoti a le Komiti. Faatalofa foi i le mamalu o lenei Palemene, Palemia ma le Kapeneta ia aemaise foi lenei itu. Faatalofa foi i le tapuaiga i lo tatou atunuu mai i le Ao mamalu o lo tatou Malo ia se i paia lava se ua aupito itiiti i totonu o le tatou atunuu.

Ia ou te talitonu o le a tuuloa se manatu o lenei itumalo e tusa ai ma le Lipoti a le Komiti.

Lau afioga i le Fofoga Fetalai a ou matau atu i le Lipoti lea ua taatia nei i le Laulau a le Palemene, ia ona faaalua lea o so matou manatu. O lea e tau tomanatu ma faitau atoa le lipoti lenei. Ae o lo o manino atoa i le lipoti lenei, e le o i ai se mea sese a le Palemene. E le o i ai se mea sese a le Komiti na filifilia e le Palemene i le tulaga o le faatinoina o le Tulafono lenei. E le o i ai foi se sasi o le Ao o le Malo. Na ou faapea e aumai le Lipoti lea ua i ai ni auala piopio i totonu o le Palemene lenei. E i ai ni auala piopio na faatino e le Komiti na filifilia e le Palemene aua le Tulafono lenei.

O lea foi na ou faapea foi, aumai foi se Lipoti a le Komiti lenei, e i ai se mea piopio a le Palemene lenei. Pe i ai ni uiga sese na faatino lea na ala ai ona pasia le Tulafono lenei.

FOFOGA FETALAI: Ia ou te fesoasoani atu i le sui usufono mamalu a o folau pea lou sa ma sausaunoa, atonu o le avanoa taua o lau afioga o lea ua... Ia e leai e... a silasila lau afioga, e leai se fautuaga a le Komiti e aafia ai le Palemene, po o aafia ai foi ia le Komiti sa faatinoina.

Mo le silafia e lau afioga, e pei ona amata mai ia le mataupu lea ona o le aufaigaluega, na mafua ai ona faavae ia le suesuega lea. Ne i taitai sese ai le faafofoga mai a le atunuu ma le Palemene leai o lea lava e manino. O mafuaaga lava o tua atu o le Palemene, ae o le agaga o le Komiti, se i toe silasila leaga e ese le mea na silasila ai le Palemene ma lo outou Komiti, ese mea ia na tulai. Pei o le mafuaaga lena e silasila i ai le sui usufono mamalu.

Faauau le saunoaga.

Afioga LEAANA RONNIE POSINI: Lau afioga i le Fofoga Fetalai o le ala tonu lea na ou muamua atu ai i le mataupu lea leaga o le Tulafono na pasia atu e le Palemene. O mea la e i tua atu o le Palemene, ou te talitonu o ai e na te toe sosofaina le tofa a le Palemene? O ai e na te toe aumaia na te toe suia ia le mea ua tasi i ai le Palemene? Aua o le ala lea na ou taupuepue atu lau afioga, pe na i ai se mea sese a le Komiti lea na filifilia?

E oo foi i le tatou Ao mamalu o le Malo, pe i ai sona sasi? O lea e manino, e matua manino lava i totonu o le Palemene, leai lava ma se mea e faaletonu. Ae e pei o suesuega ia ua aumai, o suesuega o tua atu o le Palemene. O lou la talitonuga, se e le sosofaina maia, e faafefea ona sosofa ma toe faasolomuli le Tulafono?

Ao mea ua pasia i totonu o le Palemene lenei, o mea i tua atu, o lou lea talitonuga. O lau faitau, se pei ua pule mai i tua nuu...

Tofa Hon Olo Fiti Afoa Vaai: Lau afioga i le Fofoga Fetalai, o se mea e fia faasao...

FOFOGA FETALAI: Se i onosai mai ia le sui usufono mamalu, se i tuu atu.. Ia se i saunoa mai lau afioga i le Minisita...

Tofa Hon Olo Fiti Afoa Vaai: E sao lelei lava le saunoaga a le sui usufono mamalu. E leai se isi e na te toe sosofaina se mea ua tofa i ai le Palemene lenei. Ae o lea e maua atu i le Lipoti a le Komiti, o lea ua i ai tagata ua sosofaina e pei ona taoto mai i le Lipoti a le Komiti, o tua atu o le Palemene lenei.

Ae manatua foi, pe sui i le “a” i le “e” se upu i totonu o so o se Tulafono, e aumai i totonu o le Maota lenei e sui ai. E le mafai ona suia i tua. Ia o lea foi ua faapea mai saunoa mai le sui usufono, i le sese lea ua i ai e leai foi se sese i le Ao o le Malo. A le sese lea na sese le sainsi a le Ao o le Malo ona o le mea lea na tulai atu i tua atu o le Palemene lenei. O le Ofisa o le Fono, ma le e faia le fautuaga i le Ao o le Malo. O i na na mafua ai ona sese le sainsi a le Ao o le Malo.

Ao totonu lava ia i le tatou Palemene ma le pasiaina o le Tulafono lea e vevesi ai, saolele lau saunoaga. E na o totonu lava i i e leai se isi e na te toe suia se Tulafono. Ia e pei o lou tulai atu lea ae sao lelei lava. Ua i ai e ua sosofa le tofa a le Palemene.

FOFOGA FETALAI: Ou te talitonu ua manino lea tulaga lau afioga i le sui usufono mamalu. O lea e pei ona fai atu foi se tala a le Nofoa, o lo o saolele lava le saunoaga. E le o afaina lava le Palemene, e le o afaina foi le tou Komiti ia ae pau lava o lea, ia o lea ua maua mai nai suiga i tua atu, ia ma ua afaina ai foi le sainsi a le Ao mamalu o le Malo, aemaise foi ua afaina ai foi ma le tatou Faamasinoga o Fanua ma Suafa. E pei o le tulaga lena.

O le manatu foi o le Palemia ma le Kapeneta ia ae mafaufau leaga o measina ia a le atunuu o fanua ma suafa. O mafuaaga tonu na lea ua tuumamao ai, ia ma se i sailiili mai e le Komiti, po o le a se tulaga o i ai, ma fai e tatou se fofo. E pei o le agaga lena, ae o lea ua saunoa le Minisita ua uma foi na taumafai atu le Nofoa, e le o afaina ia le Palemene, e le o afaina foi la outou Komiti.

Ma le faaaloalo.

Afioga LEANA RONNIE POSINI: Lau afioga i le Fofoga Fetalai, leai o le tulaga lena na ou taua ai tulaga o le Palemene ma tulaga faapena. E i ai la o lou manatu, afai o lea ua sasi mai tua, ae o le a soloia ai ma faasolomuli

le Tulafono a le Palemene ua uma ona pasia? O le uiga tonu lava lena o lau tala lea e fai atu. E faaletonu ma sasi ia le aufaigaluega, ae omai e faasolomuli ma soloia ai le Tulafono? Tulafono na pasia e le 2/3 o le Palemene? O le fesili lena, na aumai la ia...

Susuga Hon Laauli Leuatea Polataivao Fosi: Lau afioga i le Fofoga Fetalai o le fesili...

FOFOGA FETALAI: Ia se i tulai mai ia le afioga i le Minisita, e mafua le faauilavea o le fesoasoani i le tatou mataupu. Saunoa mai lau afioga i le Minisita.

Susuga Hon Laauli Leuatea Polataivao Fosi: E lelei lava lo tatou felafuai leaga o lea e faafofoga le atunuu. O le fesili la i le sui usufono mamalu, e te talia o lea ua iloa e le Palemene ua faaletonu le Tulafono, ae e te talia lo tatou o faaletonu ai pea? E te talia o lea ua aumai le Lipoti a le Komiti ua i ai i latou ua suia le faaiuga a le Palemene na fai? E le 1, e le 2, ua lasi.

O lea la e te saunoa mai nei, e faaauau le sasi lea? E te talia le omai o tagata e le o le finagalo lea o le Palemene na fai, ae fai lava e latou i fafo? O i ina lea e avatu ai le fesili lea, pe e te talia? Pe e te tali lo tatou o faasolitulafono? E te talia le faasolitulafono aua o lea ua sau le fautuaga a le Komiti, ave loa la i lima o le Tulafono.

Ou te matuai ou lagolagoina lou finagalo e leai se pule e fau ai le Tulafono, o le pule lenei o le Fono Faitulafono a le atunuu. Ma e leai se isi e i luga atu, o le Fono Sili lenei a le atunuu. Faafetai o na e maua lou finagalo lena, ae o le manatu lea na tau avatu, o lea ua matau o le Komiti na filifili e tatou. E lauliliu pe o le a le mea ua tupu i le Tulafono ae o lea ua sau ia le latou Lipoti, tele le afaina.

Ae o lea ou te matau atu, ua e fai mai, tusa pe iloa e le Komiti ua sasi ae tatou o sasi ai pea. O le fesili lena.

FOFOGA FETALAI: Ia talitonu o lea ua fesoasoani mai foi le afioga i le Minisita i lau afioga i le sui usufono mamalu. Faaauau mai le saunoaga.

Afioga LEANA RONNIE POSINI: Lau afioga i le Fofoga Fetalai, faafetai tele lava. O lea ua saunoa le afioga i le Minisita o Tupe, ou te talia le faasao o faaletonu o le Matagaluega na aafia i le mea lea. Ae ou te faalogo soo foi i le Taitaifono, ona faapea lea o lana tala e i ai isi taimi e saunoa ai, o le Tusi Paia lea a le Palemene. O le Tusi Paia lea a le Palemene, o lana Tulafono Tumau. O le tali la, alu i le Tulafono Tumau lea e i ai i totonu i le mea e agai i ai pe a i ai se faaletonu o le Ofisa. Ae e le o le tuu o le Tulafono Tumau ae fai lava o latou finagalo.

Tofa Hon Olo Fiti Afoa Vaai: Lau afioga i le Fofoga Fetalai, o le mea e fia faasao...

FOFOGA FETALAI: Ia, se i tuu atu le avanoa i le afioga i le Minisita, i le faauilavea...

Tofa Hon Olo Fiti Afoa Vaai: O le Tusi Paia lea a le Fono Aoa, Standing Orders. Ae e i ai la le isi Tusi Paia e sili atu na i lo le Tusi Paia lea. O le a le Tusi Paia lea? O le Faavae o le Malo o Samoa. O lea na i ai suiga ia ua o tatou vaai atu ai.

A lea ua o tatou vaai atu i le Lipoti a le Komiti, o lea ua sui le Faavae, sui le vaega o le Faavae. E sao ai lau saunoaga, e manaomia le 2/3 o le atunuu e taua mai ia latou sui usufono mamalu, ona faatoa mafai lea ona sui le Faavae. A lea na sui matutu lava i fafo. Ia o ai la a e toe sai i ai?

Ma le faaaloalo.

FOFOGA FETALAI: Ia, o lea ua manino le fautuaga a le Minisita.

Susuga Hon Laauli Leuatea Polataivao Fosi: Lau afioga i le Fofoga Fetalai, si mea laitiiti lava lea...

Afioga LEAANA RONNIE POSINI: Lau afioga i le Fofoga Fetalai,

FOFOGA FETALAI: Mo le faasaoina o lou taimi, se i saunoa mai lau afioga...

Susuga Hon Laauli Leuatea Polataivao Fosi: Leaga o lea ua toa 2, toa 3 i i sui usufono o le la itu o saunoa i le mea lea, fai mai e faigofie lava. E faigofie na ona tatou fetuunai lava o Tulafono Tumau faataatiaese le isi vaega o Tulafono Tumau ae toe tasui mai totonu. Talofa e. O le mama lena o la outou silasila i le mataupu lena, a o le mea foi lena sa tatou sau ai i le Paeaiga lea na uma nei, faigofie ia, na ona faataatia lava o le isi Tulafono Tumau ae fai le mea e malilie i ai le Itu toatele. E le o le mea ea lena o lea e augani atu ai? O lea ua saunoa atu le Minisita, ua oia le Faavae o le Malo lea e apaapa atu ai nei. Po o le a le Tulafono Tumau, tulou, 10 tausaga. Masalo e te le o lagona leaga e te le i saofai i luga i i. Sa ou saofai i luga i i, e tasi lava le tagata e faatulaga le Tulafono Tumau, na o le Fofoga Fetalai, o ia la e i ai lana pule ma lana tofa e faatonutonu ai le Fono. Ae na ona matou faapena atu, aua le faaogaseseina Tulafono Tumau e faatulaga ma tau punipuni ai mea o faaetonu. O le tuualalo lena, faaoga sao le tatou Tulafono Tumau e faatonutonufolau ai ma faasaosao Tulafono ua tatou iloa ua faaetonu.

FOFOGA FETALAI: Ia, masalo lau Afioga i le sui usufono mamalu, ua lava ma totoe foi nei fautuaga ua tuuina atu.

Afioga LEANA RONNIE POSINI: Lau Afioga i le Fofoga Fetalai, ia o le ala lea na ala ai ona tufa mai e lau Afioga tusi ia e mulimulitai i ai tatou o sui usufono mamalu o le Palemene. A o lea ua ou faalogo atu i le saunoaga a le Minisita, leai, aua tatou te mulimulitai i le Tulafono Tumau. O lona uiga o lona finagalo, tiai Tulafono a le Maota ae fai lou finagalo? Ia o le ala lea, o le ala lea, o le Tusi Paia lea a le Palemene.

Tofa Hon Olo Fiti Afoa Vaai: Lau Afioga i le Fofoga Fetalai o le mea e fia faasao.

FOFOGA FETALAI: Ia se i tulai mai.

Tofa Hon Olo Fiti Afoa Vaai: O le mea e fia faasao, o le Tulafono Tumau leni, e fai mea faalogo i le Faavae, le Tulafono Faavae. A lena e manino lava, 113 o le Tulafono Tumau o lea e fau mai le 60 o le Faavae. A silasila i ai, e le mafai ona masepu ese le Tulafono Tumau i le faatonuga a le Tulafono Faavae. Ma le faaaloalo.

FOFOGA FETALAI: Ia ou te iloa le sui usufono mamalu, o lea ua tatou malamalama ma e le aoga foi ona tatou fefinau i ia mea i luga o le Tulafono Tumau o lea ua manino, ae taua foi le fautua mai a le Minisita i le tulaga lea o le... Masalo a e maua lelei atu le saunoaga a le Minisita o Galuega, ua suia le Faavae i suiga ia na fai i tua atu o le Palemene. E pei o le mafuaaga lena o lea e tau tilotilo ai ma aumai le fautuaga a le Komiti, ia se i tatou vaavaai totoa i ia tulaga ma le... Se i tulai mai lau Afioga i le... E te agai i le sui usufono o Safata?

Afioga Sulamanaia Fetaiai Tauiili Tuivasa: Ioe, ou te agai i le sui usufono lea, leaga o lea ua lote le Tulafono lea, toe lote atu ai ma le Faavae, a o lea e galo i le Minisita le la o Felauaiga, e i ai le isi Tusi i luga atu o le Faavae, le Tusi lea. Na pau lava lea o le sui usufono o lea lava e sau lava ma aumai le Tusi lea, ne i galo foi lea le Tusi lea i le sui usufono mamalu lea le Afioga i le Minisita. Ma lou faaaloalo lau Afioga i le Fofoga Fetalai.

FOFOGA FETALAI: Ia, o le Tusi a lena ia o le Tusi mo i tatou uma i luga atu lava o isi Tusi uma, ae malie ia o lea ua talanoa le vaega lea i le Faavae o le Malo o Samoa ma le Tulafono Tumau e taitai ai le tatou galuega. Se i tulai mai...

Afioga Auuapaau Mulipola Aloitafua Mulipola: Lau Afioga i le Fofoga Fetalai, pe maua se avanoa.

FOFOGA FETALAI: Oi, ia se i tuu atu ia le avanoa i le Taitaifono e faasaoina ai lou taimi.

Afioga Auuapaau Mulipola Aloitafua Mulipola: E leai se agaga ia te au o le Taitaifono ma le Komiti lenei e faauilavea i le saunoaga matagofie a le Afioga i le sui usufono. E pau lava o lea leaga o lea e matau atu, pe ua faatolu ona saunoa le sui usufono ma faapea mai ia te au ma le Komiti i le galuega fita sa fai e le Komiti lea na savalia le atunuu, 8 pe 9 masina. O lea foi ou te maua o le Afioga a le sui usufono o le sui usufono o le Komiti. Ona toe faapea mai foi lea e le o afaina le Palemene, e le o afaina Le Ao o le Malo. E sao, a lea e tau atu i totonu o le Lipoti a matou ma le Komiti, e leai lava se mea o afea ai le Komiti na faasavalia le Tulafono, e leai foi ma se mea o afea ai e le Komiti se faaletonu o le Palemene, e leai foi ma se mea o le Lipoti a le Komiti lenei o faapea atu ai o afaina, tulou le Afioga i Le Ao Mamalu o le Malo, na o e la e i fafo ua osofaia le Palemene. O le mea lea ou te fia faamalamalama atu, ae lelei la lou saunoa mai po o le a le itulau o le Lipoti a le Komiti o lo o agai mai i se faaletonu o Itutino ia e tolu. O le mea lea e fautuaina, saunoa sao mai i le Komiti ma le Tulafono ua uma ona faataatia. Ma lou faaaloalo i lau Afioga.

FOFOGA FETALAI: Ia, o lea ua saunoa manino le Taitaifono lau Afioga i le sui usufono mamalu.

Afioga LEAANA RONNIE POSINI: Lau Afioga i le Fofoga Fetalai, ia e le o maua tele mai e le Taitaifono. O lea lava na manino, e leai se mea o faaletonu i le Komiti a le Palemene na filifili e le Palemene leai se faaletonu o le Palemene pe i ai foi se sasi o Le Ao o le Malo, o lea ua atoa le Tulafono. O le uiga tonu lena o lau tala, ae afai o ni mea i tua atu o le Palemene, ia o le a omai la e toe sosofa le Tulafono ua pasia e le Palemene? Lea ua e saunoa sao i ai. Afai o se sasi o se toatasi po o se toalua ae sosofa ai le tofa ma le faautaga ua tasi i ai le Palemene? O le uiga tonu lava lena o lau tala. Ua tatou apoa mai mea o tala i tua ma tou molimau ia, a o lea ua manino le Palemene e leai se mea sese a le Palemene.

FOFOGA FETALAI: Ia, see ese ma le... ia, lena faaauau le saunoaga.

Afioga LEAANA RONNIE POSINI: Lona lua lau Afioga i le Fofoga Fetalai, i lau matau, o lea e manino lava fautuaga a le Loia Sili ma Loia, e matua manino lava le aumai i i, ma e leai se upu faapea e faasolomuli le Tulafono. O le Loia Sili ma tagata e i ai Loia o popoto faapitoa ia a le tatou

Malo, e faamoemoe i ai le tatou Malo. Leaga e i ai foi isi tagata e pei e fia Loia ae le ni Loia, o latou e i ai le potou lea, lea na aumai le latou fautuaga, ae le i i ai se fautuaga e faapea mai e faasolomuli le Tulafono ma faaleaogaina le Tulafono. E matuai ou ofo lava i le le talia o fautuaga a le Loia Sili ma le mamalu o Loia na fai ai a latou fautuaga, a o lea e tulituliaupu lava. A ou vaai atu foi lau Afioga i mea ia o imeli lea e fetauai, e leai ma se faatonuga lava o sau i totonu o imeli ia a le Faamasinoga ma le Ofisa o le Fono e sui le mea lea, sui le mea lea. O la e aumai faafautuaga. O la e manino lava o la e aumai faafautuaga. A o la e i ai le upu mulimuli la e aumai e le Faamasinoga, taatia atu. E leai se mea... ua matua avesese foi ia tala fai mai e faatonu ma tasui loa. E lagona ai foi le faanoanoa i lau Afioga i le Fofoga Fetalai, i ia ituaiga lafoga ua lafo i totonu o le Palemene lenei, o la e manino i totonu o tusitusiga o imeli ia.

FOFOGA FETALAI: Ua maea le taimi o le sui usufono.

Afioga LEANA RONNIE POSINI: Lau Afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, ou te fia faauilavea i le saunoaga a le sui usufono faamolemole.

FOFOGA FETALAI: Ia, saunoa mai.

Tofa Hon Lauofo Fonotoe Nuafesili Pierre Lauofo: Ia, faafetai lava i le saunoaga manino a le Afioga i le sui usufono mamalu nei. A o lau fesili faamolemole, aua o lea e aumai lava saunoaga, solitulafono, solitulafono a isi sui usufono mamalu o le Maota, a. A o lea la e saunoa, e leai se mea o solitulafono. E na o le faamasinoga e faamaonia le mea lea o le solitulafono pe mafai lava ona fai e le Komiti? A o a foi ni Tulafono ua solia, a o ai ua solia nei Tulafono? O le fesili lea ma le faaaloalo lau Afioga.

FOFOGA FETALAI: Ia, o le mea ou te fesoasoani atu ai i le faauilavea a le Sui Taitai, ia o le a e fesili nei la i le sui usufono o lea e lauga, e le o le sui usufono lea e ona le Lipoti a le Komiti. O le Lipoti a le Komiti lea e i ai le fautuaga. Ae ua manatu le sui usufono mamalu ua maea lou taimi, ae faauma mai loa ma... aua e te tali fua i le fesili a le Sui Taitai e le talafeagai.

Tofa Hon Olo Fiti Afoa Vaai: Lau Afioga i le Fofoga Fetalai na o si tamai mea lava lea e tau faasao atu i le tulaga o lea ua talanoa i...

FOFOGA FETALAI: Se i onosai mai la se i tuu atu i le Minisita o Galuega.

Tofa Hon Olo Fiti Afoa Vaai: O lea ua talanoa i imeli. A o tagata tonu lava lea na saunoa i ai le sui usufono o lea e sosofa le mea lea, o le lua lea sa talanoa i luga o le imeli. Ae ou te le tau atua, ae aua e te popole i le tulaga o lea foi ua fesili le Sui Taitai po o le solitulafono. E leai. Tatou faatali i i i le fautuaga lea na aumai ma le suesuega lea o le a tuuina atu i le Ofisa o Leoleo ma le Faamasinoga, ia ona tatou mautinoa ai laia, a o le mea lava ia i le tatou tilotilo a tatou o sui usufono mamalu o le Palemene, lea na e saunoa ai. O ai se na te sosofa le tofa a le Palemene lenei, ua na soli le Tulafono a le Palemene.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai, o lau fesili lea na agai i le sui usufono mo Safata ae pei lava o la e tali mai o e le Minisita lau fesili. Leai o lea o le a...

Ae ou te tulai ma le faaaloalo ua ou vaai atu o lea lava e lava nai minute ia e totoe, *E faaopoopo sina 10 minute.*

O le lafo ma le talosaga ma le faaaloalo.

FOFOGA FETALAI: E leai se isi o faaluaina le lafo. Ia, e manatu foi le Nofoa, e leai e toe lava foi ma totoe se isi tatou sui usufono i le tatou taimi lea e totoe. E manatu, ia leaga o lea ua fai atu le faaiuga a le Nofoa, malilie foi i le lafo ma le faatu mai faapea foi le lagolagoina, ona o lea ua avatu le faaiuga a le Fofoga Fetalai, le Nofoa. Faamaea mai, o lea o le a faamaea mai le saunoaga a le sui usufono mamalu.

Afioga Fepuleai Faasavalu Faimata Sua: Faamolemole lau Afioga e tau agai atu meamanu e le i uma lana saunoaga i si mea lea e fia malamalama.

FOFOGA FETALAI: Ia e toe umi ai le taimi o le saunoaga a le sui usufono mamalu o lea ua faauma atu lona taimi. Malie mai le sui usufono mo Salega 1, se i faamaea mai le saunoaga a le sui.

Afioga LEANA RONNIE POSINI: Lau Afioga i le Fofoga Fetalai, e i ai lava le manatu leaga e usitai tele atu i lau Afioga i le Fofoga Fetalai, ae a matau atu i lauga a le la Itu na lauga faataupou toe lauga i le Lipoti lea, ia ona lagona lava lea o le faanoanoa o lenei itumalo ina ua e faamutaina lota taimi, ae ou te usitaia. Ae o le a tau faauma atu... e tele lava nai manatu e i ai leaga sa ou i ai i totonu o le Komiti lea. Na ou manatu foi e i ai se tofa fetuutuunai o le Maota e tau faaali atu ai ni manatu faaetutulafono e ala lava i le Tulafono lenei. O lea ou te matau e i ai le saunoaga lea na faapea mai e toe faafoi Samoa i le Faavae. Ae a silasila foi lau Afioga i le Faavae o le 1960 lau Afioga, lena e i ai upu a tagata na faia le tatou Faavae, a i ai ni Palemene e mafai ona toe teuteu le tatou Faavae mo le agai atu i luma, e le o mafai ona teuteu i le taimi lenei. O le mamalu la lea o lea e saili nei e tatou,

lea ua ala ai ona aumai le aganuu i totonu o le Faavae, lea ua aumaia ai le faakerisiano i totonu o le tatou Faavae. Ma o le Tulafono foi lenei, ua leva ona taufaaleaga e tagata, fai ai faatosina a tagata i luga o le palota a o lumanai le palota lenei. Lea na fai mai e a? Fai mai, o le Tulafono lenei o le a matua faatauina ai fanua faaleaganuu. Lea na saunoa le Palemia talu ai, a o i ai se Loia e atamai, ona aumai lea i totonu e sau e faaali mai lona manatu.

FOFOGA FETALAI: Ia, ua manatu le sui usufono mamalu, o lea o le a toe lagalaga le tatou Maota ona o lea o le a oooo i isi tulaga. Ma e talitonu foi le sui usufono mamalu, o lea foi na avatu lava le tuualalo a le Nofoa ona o tatou taimi faatapulaaina. Silasila mai foi o lea lava e galulue le Failautusi ma le Ofisa lenei ina ia faia tatou taimi faatapulaaina. Ma e le mafai foi ona auese ai le Nofoa i galuega a le Maota. O le mea lea, o lea ua avatu le tala a le Nofoa, faamaea mai lau saunoaga ua maea lou taimi, leaga o lea e lagalaga mai isi mataupu fou ia. Faamaea mai lou taimi le saunoaga a lau Afioga i le sui usufono mamalu.

Afioga LEANA RONNIE POSINI: Ia, faafetai tele i lau Afioga i le Fofoga Fetalai. E pei lava ona ou fai atu e tele manatu faaletulafono o lea ou te tapena i ai i le mea lenei. Ia, lou itumalo ma Samoa, o lea ua e faafogafoga mai i le tulaga ua oo foi i ai lenei Lipoti, ia o se Lipoti e ese lava le mea o la e taatia ai le Lipoti a le Palemene, ese le mea o lo o i ai le finagalo o tatou Loia ma le Loia Sili, ua ese mamao lava ma le Tulafono. Ia manuia le Fono. Ou te tetee i le Tulafono.

FOFOGA FETALAI: Malo faafetai. Ia o lea ua maua, ua leva lava ona tataua ona e saunoa mai e te tetee i le Tulafono i lo le faaumiumi fua, ae o le mea sili o lea ua maua. Ia, o lo o lava le tatou taimi mo se tasi o sui usufono.

Ia o lea ua matau atu o lea ua fou mai le sa o le sui usufono mamalu mai Vaimauga 3 Honorable Tapunuu.

Afioga Hon TAPUNUU NIKO LEE HANG: Faafetai i lau Afioga i le Fofoga o le Maota mo le avanoa. Ia sa mafaufau pe fai se lauga, ae peitai ane o lea e lava le taimi. E puupuu foi lava se manatu e fia faaalia.

Ae muamua faamauina le agaga o le faafetai i le Taitaifono ma le Lipoti, e ui lava foi e tele ni faamatalaga sa ou le lagolagoina, pei e fai si mafamafa, ae peitai e pule lava le Taitaifono ia i lana ia saunoaga, o le aiatatau lava lea a le sui usufono mamalu ia e faaali lona finagalo. Ua matauina foi lau Afioga i le Fofoga Fetalai, ua sausaunoa le tele foi o lena Itu i le matuia o nei tuuaiga ua aumai o nisi faapea ua solitulafono, ia ma tulaga uma faapena. Ia o lea ou te fesili lava po o a uma latou, aua e le o aumaia ni faamatalaga i le Lipoti a mea o ai le sui usufono lea na solia lea Tulafono, o ai na faia ia suiga i totonu

o le teuteuga. Pei o nai mea na e tau popole ai foi se manatu e fai e lagolagoina le Lipoti, aemaise la fautuaga ia ua tuuina mai lau Afioga.

O le fautuaga muamua lava lea e fia fesiligia pea le Taitaifono, ia vave faamatuuese pe faasolomuli mai i tua immediately dispose Tulafono nei e 2 ua aafia ai ona o suiga ua faatino faasolitulafono e se tagata po o ni tagata ae ua talitonuina e le Komiti e le o le atoaga lea o nei Tulafono sa pasia e le Palemene ua mafua ai ona maua ane lomiga eseese e 4.

O le isi la lau Afioga i le Fofoga Fetalai, ou te le o manino foi i eseese ia e 4 e taua i le Lipoti ae peitai, ona e i ai si ou vaivaiga, o lea foi sa saunonia nisi sui usufono o le la Itu, e tatau ona aumai e toe vaavaaai lelei ma toe teuteu. O le teuteuga la lea ou te fia talanoa i ai. Ma i lou talitonuga i mea ia o Tulafono Tumau, a i ai ni Lipoti faaletonu, ona tuu mai lea e toe faatalatalanoa, aumai ma ni fautuaga toe teuteu, ona ave lea e toe teuteu mai e le Komiti ma toe tuuina mai i totonu o le Palemene. Aua e sao ai faamatalaga ia e faapea, sa le tatau ona suia, po o ai lava ia e aafia.

O lea foi ua aumai le isi fautauga e ave i leoleo ma ave i le faamasinoga. Ia ou te talia foi ia fautuaga aua e tatau ona suesue. Po o le a tonu lava le aafiaga o solitulafono ia, leaga o mataupu nei a le Palemene e le soona fai fuaina e se isi ae le i pasia, aemaise le Komiti lea na aumai le fautuaga. Ia pei o nai fesili na e fia maua ai se malamalamaaga.

Ia ma le isi lau Afioga i le Fofoga Fetalai, na o se tuualalo, ona o lea ua faagasolo le Tala o le Tupe, ae i lou manatu, o le mataupu lea e tatau ona ave i ai le faataua a le Maota. Ua oo mai foi faasalalauga a le Failautusi o le matou Komiti e amata taeao matou fonotaga. Pei la o lou tulai atu ina ia faatea atu lau lauga, ae tapena le matou Komiti leaga e 14 aso lea e tuuina mai. E ave la le matou faataua a le matou Komiti ina ia uma le faatalanoaina o Matagaluega eseese ia i lalo o le paketi, ma talafeauga le taimi e aumai se Lipoti i lau Afioga ma le mamalu o le Palemene.

O lau talosaga la, o lea ua maea le taimi, ae a pe a faamuta loa lauga a le la Itu ae aumai le avanoa ia i matou se i avatu ni matou... aua o mea lava e talitonu e lagolago uma e le la Itu le Tulafono, ae pei o se mea foi lele e faatauaaina ai le tatou Tala o le Tupe, aua e ala foi ona ou talosaga atu ona ou te i totonu o le Komiti o Tupe, ina ia aumai pea le faamuamua i le tatou galuega lea, ae pe o le a sou finagalo ae faaauau pea taeao, ae ou te le faatonuina foi lau Afioga. Na o se tuualalo, ia onosai maia le tou Itu, ae faauma atu matou ia ona pasia ai loa lea o le tatou... Ia na o se tuualalo lau Afioga ae le fai ai. Ma lou faaaloalo lava.

FOFOGA FETALAI: Faafetai. Malo lava faafetai foi i lau Afioga i le sui usufono mamalu, o le sui usufono matua foi o le Maota ma le fautuaga ua aumai. Ia o lona tonu lava o lo o silasila i ai le Nofoa ma le mamalu foi o le Malo ma le Kapeneta i ni fetuunaiga faapena. Ae faafetai o lea ua maua lou finagalo, o le mea sili lava lea ua e saunonia tonu lava i le tulaga lea o le

faamuamua o le tatou Tala o le Tupe. Ae faafetai mo lou finagalo faaalua, o lea ua faamau lelei e le Taitaifono nisi tulaga e pei ona aumai foi le saunoaga ma...

Na o si vaega lava lea foi e faufautua atu ai foi le faailoa pea e le Nofoa, ona o lea e saunoa lau Afioga i suafa o i latou o lo o aafia. I totonu lava o le tatou Tulafono Tumau e le mafai ona faailoaina suafa o i latou i totonu foi o suesuega a Komiti. Ae o le tulaga foi lea i le mataupu e ave i le Ofisa o Leoleo ma le Loia Sili, ia o lo o i ai foi i ina le natia o suafa o i latou ae se i faatino pea se suesuega pe a faapea e i ai se mea faapena. Ia ma o o suesuega foi latou a leoleo ma le Loia Sili e i ai lava manaoga faaletulafono e ao ona faamalieina uma faatoa iloa lea ua aafia se tasi. O le mea lea, tatou faamoemoe pea i le fesoasoani mai o le Atua i le galuega foi a le Loia Sili latou ma le Ofisa o Leoleo i tulaga faapena. Ae o le uiga lena o le Tulafono Tumau, e le mafai ona faailoaina se suafa o se tasi o lo o talanoaina i totonu o le tatou Palemene.

Ia, talu ai ua matau atu o lea ua tulata foi le tatou taimi malolo... Se i tulai mai lau Afioga i le Tamaitai Palemia.

Afioga Hon FIAME NAOMI MATAAFA: Faafetai lava i lau Afioga i le Fofoga Fetalai, ua maua foi i nisi o finagalo le taua o le mataupu lena e faaauau, a o lea foi o lo o taatia le galuega o le faagasologa o le tatou Tala o le Tupe. Ia, aua le atugalua le finagalo e i ai le tatou aso Fono taeao. Ae i lau Afioga i le Fofoga Fetalai, a o le i tuua le tatou galuega i lena aso, e ao ona faamauina i le tatou Fono le agaga faafetai mo ananafi, e le gata i tulaga tofi o le Malo i le afiio foi ma le faailogaina o le tatou 60, ae faapea foi le atunuu i afioaga ma itumalo ma nuu ma faalapotopotoga o e sa faia ma faatino a latou sauniga. Ia, o le agaga lava ia o le faafetaia o le agalelei o le Alii ua tatou aulia le aso ananafi. Faamalo faafetai i a outou Afioga, sui usufono o le Maota o e na mafai ona auai mai e faamamalu le tatou faamoemoe. Ia talosia ia le faigamalaga o le tatou tausaga lena o le a faagasolo e faailoga ai pea le tatou 60 tausaga a ia manuia tele le tatou Fono. Faafetai.

FOFOGA FETALAI: Malo faafetai, malo malele i lau Afioga i le Tamaitai Palemia, o lea foi ua faafofoga ma le totoa le paia o le Maota aemaise foi o le faafofoga mai a le atunuu i le faataua foi o le aso ananafi. Faafetai foi i lau Afioga ma le Komiti mo tapenaga uma. Ou te talitonu lava o lea ua maua mai foi e le mamalu o le atunuu tapenaga uma o le tatou faamoemoe i le aso ananafi. Ia, o le uluai saunoaga foi o le tatou aso lena o le Afioga ia Peseta, le sui usufono mai Faasaleleaga 5, na aumai foi lana faafetai tele i lau Afioga ma le Komiti, aua tapenaga uma o le tatou Tutoatasi i le aso ananafi, o lea na manuia ai mea uma. O le mea lea, malo faafetai mo saunoaga.

Ia, e momoli atu le faafetai a le Nofoa i lenei aso ma tatou fonotaga, malo lava le onosai, faafetai foi i sui usufono mamalu sa sausaunoa. Ae ona o lea ua tatou oo i le taimi e tolopo ai le tatou galuega mo lenei aso, o le a maua avanoa mo nisi sui usufono e fia saunoa pe a aulia atu i le manuia le taeao a taeao. Faamalo le usufono i le tatou Maota, faafetai foi i le faafofoga tapuai a si o tatou atunuu. Alofagia e le Atua galuega o faatali mai o lenei aso.

Ae tatou te le i tolopo, ou te talosaga atu i le sui usufono mo Faasaleleaga 5 se i faaiu mai le tatou fonotaga i se tatalo.

Na tolopo Taulumaga a le Fono Aoao Faitulafono i le itula e 1:02 i le afiafi seia aulia le Aso Faraile, 3 o Me 2022 i le itula e 9:30 i le taeao.